

蘇魏公文集

萬靈著

蘇魏公文集卷四十三

宋太子太保右僕射同中書門下平章事司空魏國公蘇頌撰

逢年舜畊

高孫萬靈錫經重祿

晉爵耀庭

表

謝中太一宮使

臣某言今日進奏院遞到勅牒一道並尚書省劄子伏蒙聖恩特遣充中太一宮使許任便居住臣即時受命交割本州公事與監司權管勾訖見起發往潤州居住者臣本以衰遲懇祈休退淵衷眷舊未忍遐遺琳館增員仍從遙領坐叨要職特免涖官遂獲安居皆為異禮臣某中謝伏念臣性稟中下生遭盛明荷四朝樂育之恩歷三省訃謨之地非才輔政不能有所建明失職弗誅尚且容於尸素殿廡通籍淮海出藩顧筋力之已疲視章印而有愧冒茲名器負乘每懼於盜招念彼禽魚栖息猶知於日暮殫誠牘奏干聽竚聽敢期從欲之仁上軫恤功之念明綈降命中旨推慈假使職於元都許家居於故里官尊祿厚頓增桑梓之輝光

迹放心閒實便邱園之頤養此蓋伏遇皇帝陛下乾坤博施坯冶壹陶生物必因其材使人各得其所曲於最老久預禁嚴未遽絕於班資俾遂諧於燕息始終弗替蹇薄難勝病木婆婆雖殆忘於生意老馬踟躕猶結戀於君軒欲報生成未知死所倘肺肝之可鏤在溝壑以無忘瞻望宸庭但生涕淚伏恨所居在遠不獲躬詣朝闕臣無任

謝郊禮加恩改封趙郡公

臣某言伏蒙聖恩賜臣官告一道改封趙郡開國公加食邑七百戶食實封三百戶仍令臣孫男承奉郎處厚齋賜者祭則受福頒大號於黎元賞不失勞推茂恩於庶位曲記近司之舊猥加異數之隆崇輿地而擇名邦徹土田而與多邑猶揆無功之寵愈驚非據之危臣某中謝伏念臣橈棟匪材西嶷餘景螢綬資厯久玷職於殿廡任再年華獲備員於道館當官無闕閱之勞退老遠鄉閭之晏一昨五室親祠百工辛職肅雍顯相既不預三吏埽除之勤夙夜駿奔又不在諸侯來助之列既均釐於中外輒比數於等差再膺開國之榮更益爰田之食仍令孫息齋賜命書即郊次以奉迎集私門之榮觀屬已頒於滌汗難固避於走牆捧對芝泥若負芒刺此蓋伏遇皇帝陛下繼天紹統灑澤為春遵六聖之宏規觀三年之盛

禮宗祀而配上帝致聖孝以並行大賚而富善人布神休而悉徧自顧應儉之久  
難勝拜胙之恩雖燕閒方就於士鄉無階報稱而魂夢常遊於帝所圖謝生成瞻  
僚九門姑懷萬感臣無任

再乞致仕

臣某言臣聞禽魚微物猶知棲息之安韋布諸生不忘殆辱之愧矧在士鄉之老  
既踰時制之期謝事未俞辱願罔措臣某中謝伏念臣稟資不厚微幸寔多荷四  
朝拔擢之恩乏一善著聞之事姑緣舊弼久塵冒於近班薦領真祠復遷延於再  
檢處燕閒而竊祿致盈滿以生灾初隼手足之柯寢若膏盲之病秩滿而造朝有  
格力棉而跬步難前日薄魚淵視光陰而已逼心存魏闕役魂夢以徒勞若猶縮  
於印章懼遂填於溝壑況臣頻年告老猶比饗榮年過六紀之餘章凡十數而上  
朝廷容養幾同游惰之人州里觀瞻甯免婆娑之誚輒陳情之終始覲得請以歸  
休伏望皇帝陛下恢天地覆載之仁廣日月照臨之惠憫衰遲之暮景貸尸素之  
往愆賜以殘骸從其所欲倘能起無妄之疾游息於田廬庶幾為太平之民謳歌  
於聖域誠心所迫邦憲甯逃欲乞聖慈指揮檢會臣前後奏章特許守本官致仕  
臣無任

謝致仕表

臣某言伏奉告命蒙恩特授臣依前觀文殿大學士太子少師致仕仍差臣男通直郎詒齋官告就賜者結髮立朝歷載將周於五紀解巾就第拜官叨列於三孤士夫進退之優君父保全之惠寵踰所望感極難名臣某中謝伏念臣朽質薄材華顛鬢貌早嘗更於器使老猶冒於寵光福過災生幾致膏肓之疾鐘鳴漏盡未知骸骨之歸奏封屢躋於邃疏俞音特加於命數仍循舊相之比躡遷儲秩之榮而臣久任聖辰曠違班著念流波之出浦嗚咽難前顧疲馬之戀軒嘶鳴未已雖獲傳家之幸豈忘存闕之誠恩重命輕莫稱邱園之賞日暮途遠無階象魏之朝回望雲天徒深涕淚此蓋伏遇皇帝陛下陶鈞萬彙化育羣材俯矜管蒯之微嘗預鼎槐之末全其晚節賜以餘齡非惟示覆載之无私抑亦見生成之曲盡願臣之分微幸以多尚冀安居養頤衰疾倘未填於溝壑得雜處於芻蕘

謝轉太子太保

臣某言伏奉制命蒙恩特授臣太子太保依前觀文殿大學士致仕加食邑四百戶食實封一百戶仍差臣男通直郎馮齋告身前來就賜臣已於今日於潤州朝京門外望闕祇受訖者芝泥溫詔初降命於九重蒲柳殘骸遠通班於一品自慙

悴陋莫副甄陞事出非常感深載抃臣某中謝伏念臣才非敏達仕邁休明荷樂育於五朝嘗叨陪於三吏預聞國政固乏佐時之謨退老邱園猶需馭富之祿熙辰累洽興運有開帝出震以乘時照臨溥暨言如綸而求舊獎擢並加進儲保之崇賁行戶封之多邑仍令賤息齋賜誓書疾悴有年久棄人間之事寵靈驟及實為望外之榮姑慶暮塗親逢亭會此蓋伏遇皇帝陛下宅中圖大發政施仁推布德行惠之文靡謝事就間之隔念此故老早陳力於周行需然德音特加優於異數臣敢不濯冠聽命捨杖拜恩誦深厚之訓辭仰欽天造詠光華之復旦竊效壤歌雖畢餘生莫酬洪造臣無任

遺表

臣某言臣聞稟質太和生有涯而必盡戀恩聖代死可忍而猶言苟延頃刻之期少布平生之懇臣某中謝伏念臣性識庸陋生長遭逢仁宗召真書林英廟擢為臺省肆神考維新於大政而微臣獲親於清光便荷眷知躡登侍從臣以口耳無用之學驟蒙眷聖非次之知思自激昂少圖報稱竟以議詔除之非是遂止罷書命之要司三已三遷未嘗以冗外而擯棄再召再用率皆由主工之記濟入備史官進居京尹尋復以片言而坐累俄見謂直道以自明預脩進於六官仍典司於

四選遠罹家難曲軫淵衷使璫薦至於里門賻恤特殊於等列未畢苴麻之制忽悲弓劍之遺沐二聖之深慈矜累朝之舊物中臺內制徊翔敢嘆於積薪左轄三台忝竊但虞於覆餗寸長靡效微罪以行益引年辭位者歷八九期露奏陳誠者章數十上始獲歸於印紱久退處於邱園仰聞龍德之升大慰海隅之望至仁溥博上下與天地同和湛恩涵濡人物暨鳥獸咸若豈圖暮景復邁盛明鼓缶酣歌方逐畋漁之樂視陰暘日已嗟鐘漏之催且鳥將死而其鳴哀天雖高而其聽邇矧懷欲報之德敢愛垂絕之音雖無補於萬分僅或能於一得伏願皇帝陛下法堯舜之修已過中高之歷年進有德以尊朝廷示敦樸以先天下延謙直則下情無壅省營繕則民力不勞毋適宵人以防私謁之害政無作奇巧以見所寶之惟賢若乃當太平持盈之時思既濟預防之患志不期於逸豫慮常慎於幾微不忘來事之師以永無疆之譽則臣雖闔棺長夜諫弗假於陳屍瞑目九泉報猶當於結草精誠徒切悵憤不倫臣無任

謝歷日表

臣某言今日日進奏院遞到宣勅一道伏蒙聖慈賜臣某年歷日一卷者聖人之治歷數恭授以時下國之荷頒宣奉行有職仰乾文而備在戴君賜以無忘臣某

中謝伏惟尊號皇帝陛下保極奉元愛民恤物功越農軒之表慮窮象數之微前  
飭日卿預推天運校諸家之疎密審一歲之權輿氣朔推移躔離稽合杓馮魁枕  
固無辰次之差日永宵中大正春秋之序屬新書之甫就欲庶俗之周知率循舊  
章頒布列郡臣任叨守土職在訓民詳觀細札之文斯蓋先天之蘊敢不朝夕從  
事歲時省工勸耕於土起之辰趣務於火見之後所期遵奉無失經常臣無任

又

臣某言欽歷授時新四方之耳目觀文察變記萬世之章程觀細札之下頒俾列  
藩之寅奉仰承優渥退積兢榮臣某中謝伏惟皇帝陛下憲天聰明稽古謨典正  
一元而端本審六物以題期上承軒頊之規俯鑒羲和之職諸家之算皆課於清  
臺先甲之期率循於治象隨閏餘而消長順斗建以盈虛中朔正而歲成陰陽調  
而景至導五行之和氣徧育嘉生視七宿之中星肇隆丕律臣任叨守土職在訓  
民觀乾宰以數文繹辰猷而布度將使出作入息皆不緩於農時夕思晝行冀參  
修於吏事所期遵用無失經常臣無任

又

臣某言清臺運算將觀嗣歲之宜列郡承流猥被新書之賜祇戴上恩之厚俯增



遠守之光伏惟皇帝陛下體乾綱之粹精總治典之纖悉奉若天道恭授人時南  
面視四星之中靡差昏旦彝倫協五紀之叙備着綱條日官方上於奏篇乙夜親  
紆於宸覽鈎校疎密脗合經常會三統於一元成百年之積歲詔頒近列下逮方  
州臣幸預典藩列叨寵錫竊尋時訓之紀無切時農之先夏后小正尚記昆蟲之  
細呂韋月令兼推躔次之行皆所以求陰陽之大中示耕桑之要務洪惟聖典曲  
盡天時掩七歷之精微高百王之制作當官據此自識刑賞之後先編戶見之咸  
知發斂之早晚臣敢不修明所職謹視斯文露冕行春益勤勸課之業坐曹閱日  
不踰寒暑之期豈止閔臧以為榮遇臣無任

又

臣某言昔聖人處璣衡而欽天故日月星辰以之序象金火而治歷故氣物分數  
得其平蓋推步之術既精則制作之文乃定有大創革屬我聖明伏惟皇帝陛下  
攬商周之質文躬舜禹之虛數損益百世旦暮千齡前勅日卿鈎校諸家之疎密  
仰觀乾度稽參三極之短長索隱鈎深改差用驗羸胸於是象見中朔不能以  
候移克固信書昭示列辟乃眷官封之吏使知告朔之頒一札十行荷甄紆於訓  
令九章五紀使盡識於歲年臣忝在長人竊榮拜賜朝夕從事惟思務穡而勸功

寒暑不渝益勵首公而盡節臣無任

又

臣某言仰觀天象預考日星之行恭授人時使知氣候之至詔頒列郡惠浹羣生臣某中謝伏以王者稽古以奉天順寒暑陰陽之運百姓厚生而利用在農桑衣食之原數既合於珠躔氣遂均於玉燭伏惟皇帝陛下德侔覆載智察幽微合三統以正一元撫五辰而凝庶績清臺運算總七歷以裁成方底封函遍九州而誕布臣任叨守土職在訓民求庶政之所先案新書而盡在奉承寶典知協紀於萬年底與編昬趣成功於三務臣等無任

乞賜六典

臣某言伏以先唐著六官之典是為考古之書苟况稱三代之隆不貳後王之法恭惟皇帝陛下稽若上世允釐庶工謂開元之職儀有成周之體範圍命判雖於簡冊又將宣布於方來凡預通閭均蒙寵錫伏念臣夙遭際會獲齒大儒方朝廷更正於官名荷制詔對遷於階品聖明作述親逢千載之一時臺閣規撫庶識有司之大要敢緣等比輒冒守藏所有新印唐六典欲望聖慈特許依例宣賜臣一部庶得披覽前載習孰舊聞時亮天工倘獲觀於眾職之治日恪位者庶自効於

一官之勤臣無任

謝賜六典

臣某言奏牘之求思寬罪戾冊書之副詔許匪頒捧縑表以生榮刻丹衷而卒感  
臣某中謝臣聞在昔建官之制沿革靡常開元著令之初典司尤備辨其秩序具  
有綱條事名雖見於當時莫遑遍舉春秋以俟於後聖茲用鑒觀恭惟皇帝陛下  
躬親萬務之微損益百王之際謂成周之治典可舉而行以有唐之職儀最得其  
要時書不布後學罕知命鴻都之直官定牘臺之善本模傳鏤版盡刊魚魯之訛  
宣布在庭使識雲龍之紀伏念臣迂儒曲藝文館充員考載籍之古陳嘗聞粗畧  
顧朝廷之體要莫究源流幸逢至治之期新下正名之格文階貴品荷假寵以優  
遷御府新書虬抗章而自請忽拜緹囊之賜併增經櫬之光啟發篇章雖曰一朝  
之制作講求義類是皆虛代之故常足以備訪對於清閒資討論於聖治豈其間  
陋得以探詳讀三五之書自同倚相識太平之迹竊慕劉歆矧預綴於官聯固當  
勤於事守仰酬隆施誓畢微生臣無任

謝賜常平免役勅令

臣某言今日准詳定一司勅令所公文奉朝旨伏蒙聖慈賜臣紹聖常平免役

初令一部者察俗五書總利害康平之目任民九職盡轉移生養之宜坦然帝制  
之明載在官成之法徧頒列郡下逮具僚臣某中謝伏惟皇帝陛下祇遙先猷鑒  
觀治本謂法必生於眾適而今欲順於人心爰詔近司講修前訓視歲年之上下  
發斂以時校財力之重輕有無相濟者網條於畫一均多寡於大中有司遵教既  
簡允而易守編戶賦役悉均安而不勞炳焉垂世之謨是謂不刊之典豈期間迹  
預拜恩書重念臣早以錫愚嘗聞政論暨茲退老久廢吏文恭啟蠶膳但疲精於  
編摘秘藏中樞莫傳寶於昆雲仰戴宸慈竊深感涕臣無任



蘇魏公文集卷四十四

宋太子太保右僕射同中書門下平章事司空魏國公蘇頌撰

逢年舜旻

裔孫萬靈錫經重秣

晉爵耀庭

表

賀皇帝登極

臣某言伏覩制書恭承皇帝陛下以正月十二日遵奉遺制紹登寶位者中外臣民永有依賴神靈筮罔不協從臣某中賀伏以太庚嗣商實兆歷年之永代卽繼漢益開緒業之隆異世同符千齡協慶茲伏准皇帝陛下紹休洪緒眷命昊穹肇聖問於宗藩卽丕圖於帝統提五精而撫運受三策以臨尊日月正明溥乾坤而甯泰雷雨作解徧動植以涵濡上宗七廟之基高視百王之徽烈臣久塵位著世荷恩勞方退老於邱園阻慶趨於朝闕扶杖而觀詔令繼明喜邁於重熙詔訓以示子孫事上更期於盡瘁臣無任

賀欽聖太后同聽政

臣某言伏審皇太后陛下勉從遺制同預政幾共安龜鼎之隆式副臣民之望凡在臣庶舉極歡欣臣某中賀伏以皇太后陛下子育兩朝母儀萬國動必規於圖史化寔首於宮闈深居長樂之尊丕昭聖範循奉治平之制允慰上心輔盛德於唐虞軼徽音於任姒福均宗社恩被華夷臣限以老病退休不獲隨例稱慶闕庭臣無任

賀立順國夫人為皇后

臣某言恭聞今日日頒降麻制冊立皇后者有命自天肇建長秋之號正位乎內寔為王化之先上承廟社之靈下副華夷之望臣某中賀竊以軒星垂象儼宸極以居中坤德資生贊乾元而育物方交修於治典宜首正於人倫伏惟皇帝陛下始初清明嚴恭寅畏致中和而格天地躬禮法以御家邦媯汭嬪虞本帝舜聰明之化塗山興夏昭大禹勤儉之風作合皇家允符世德葢珩垂範宮壺延洪臣蒲柳衰年邱園退老側聽絲綸之出阻陪鴛鴦之班抃蹈之誠寔倍常等臣無任

謝賜登極對衣銀絹

臣某言今日日潤州遞到伏蒙聖慈賜臣詔書一道寬衣五件銀二十五兩金腰帶一條銀器二百兩絹二百匹者大明繼照榮光徧燭於幽遐麗澤流恩繁錫遽

占於耆艾奉詔文之深厚對服器以珍華拜賜不貲慙顏罔措臣其中謝伏念臣材資極陋遭遇寔多以省臺累久之勤進叨近輔以蒲柳先秋之質退老邱園俯當月制之年仰邁天飛之運顧筋骸之已瘁趨觀闕以無階方鼓舞於休辰忽郵傳於渥命細書一札煥綸綍以下臨束帛兼金與帶袍而共賁何言墮暮荷此恩章豈惟充侈於家庭寔亦增輝於里巷比蓋伏遇皇帝陛下堯仁光宅周德丕承紹興洪業之隆曲軫周行之舊衣被萬物咸均雷雨之濡惠養老臣更厚金縷之寵况餘齡之無幾駭異數之難勝謹當鏤骨銘恩望雲祝聖出同父老贊睿烈以無疆入戒子孫罄忠規而弗替伏限衰病不獲奔走闕庭臣無任

又

臣某言龍飛紫極邁千載之一時鳳詔泥封均萬分之大賚顧慙衰耄亦預匪頒煥服用以增華戒饗踰而有覲臣其中謝伏念臣斗筭小器章句陋儒逢時偶踐於機衡引老獲歸於蓬華重明繼照徒傾日月之光輝慶賜遂行咸蒙雨露之潤澤爛然龜紫之飾副以兼金之繁寵造邱園榮生里閭此蓋伏遇皇太后陛下謀定國體功勤王家推惠養以為心致中和而育物博施濟眾務開廣於堯仁承籙是將俾涵濡於周澤綬章若若幣帛芟芟暮齒何堪拜君命之再至丹誠彌切瞻



魚...文集 卷四十四  
象魏之九重伏限衰羸不獲躬詣朝闕臣無任

賀元符三年生皇子

臣某言前星發采占垂象之告符甲觀誕彌協吹銅之夙兆况坤儀之正位當震長之鴻名事越古今慶覃夷夏臣某中賀伏惟皇帝陛下體元居正恭己承祧自光宅於皇基思克隆於治道振淹起廢朝野益見於清明隕祉發祥天人動彰於丕應月直正陽之吉時生貳極之尊國本惟甯允契元良之美民黎均惠咸蒙在宥之恩臣退老江圻欣聆邦慶手足徒知於踣扞筋骸難強於奔趨企仰雲霄但馳魂幹臣無任

又

臣某言前星發采占垂象之告符甲觀誕彌協吹銅之夙兆况坤儀之正位當震長之鴻名事越古今慶覃夷夏臣某中賀伏惟皇太后陛下母臨萬國子育羣生翊嗣聖之丕基贊皇圖之興運自家刑國中外之治晏然隕祉發祥天人之應昭若月直正陽之吉時生貳極之尊國本惟甯允契元良之美民黎均惠咸蒙在宥之恩臣退老江圻欣聆邦慶手足徒知於踣扞筋骸難起於奔趨企仰雲霄但馳魂幹臣無任

賀受傳國璽

臣某言伏聞五月日皇帝御大慶殿受傳國寶者天開炎統受命冠於百王神啟坤珍得寶充於八璽自秦咸之吉壤奉螭玉之嘉祥茂對元符攷稽故寔舉正元五月之會親見臣工推渙汗大號之恩普周方域慶成盛禮歡浹情伏惟皇帝陛下題五精之期繼六聖之治積德累仁而動植茂遂彰善殫惡而朝野清明德澤誕敷瑞應沓至惟傳國之守器蓋歷代之徽章藍壁斯書篆刻久藏於厚載漢泉堅并靈光屢見於前朝由神物之護持豈人力之能致聖辰奉若天意昭然既壽永昌方詠歌於金石無思不服將聳震於要荒見海內一家之榮昭帝者萬世之福臣抱疴暮齒得謝明時側聽白臚竊欣盛德之事躬與芸牧共贊太平之功臣限以老疾在遠不獲躬慶闕庭臣無任

進華戎魯衛信錄

臣某言臣聞先王撫邦弼成六服天子有道守在四夷大禹之即敘西戎周人之惠綏中國由聲明之及遠致華裔以同風詩書所稱古今一揆臣某中謝竊以國家規恢億載之策方制萬里之區憬彼邊陲初擅權於八部屬在唐李遂竊據於一隅太祖皇帝首命帥臣經營其畧太宗皇帝載馳使指問遺有加雖服叛之靡常亦羈縻而不絕爰逮文明之世親巡澶魏之師因一介之請和賜勅書而示好

仁宗再更信誓益以金縢之資英宗嘗勅邊州寬其魚葦之禁以繼好息民之義為長轡遠馭之圖相承百年共由一道伏惟皇帝陛下德寓天覆乾剛日新紹列聖之成謨總君人之大畧謂彼方之荒忽狃我澤之涵濡歲講聘儀雖載鷹揚之氣間窺邊隙稍萌蠶食之心上靡察淵俯為全度料征暫起則戒彼創生疆域交侵則許其分畫長幼咸蒙於煦育憑陵悉為之含容宜其革心永以內面竊尋在昔禦戎之論前書載筆之傳或厚賂和親漢才得其下策或償功與地唐亦信而不疑事出權宜情非固結由至誠之不著終後悔之莫追是以匈奴未入於長城而馬邑之謀已露結贊始盟於渭水而平涼之變遽聞亂之由生兵乃弗戢豈若我朝之綏遠率令異域之歸忠偃革有年曠古無並而聖慮猶虞其越軼遂詔書思所以持循乃屬下臣討求故定料平日嘗行之務著一朝永久之規將欲付之有司使知所守又以待其來者無得而踰極遠見識微之明得禦侮折衝之要臣謬持鉛擲躬服綸函采輶軒絕代之言紀象胥行人之職撮其綱目刪彼繁蕪發例求端首述講修之始分門布序次標書幣之儀輶車別常泛之名陞見異燕辭之目至於勞賓迂摯厚往薄來朝廷之匪頌州郡之迎餞皇華四牡山川有險易之塗闕市交通貨賄有貿遷之利內則羣臣之策慮外則旁境之文移諸蕃之土

俗風宜近塞之溝封亭隧有資援據悉用條陳或見聞於異辭或圖上於方畧推原本末則大事小事而俱收蒐補闕遺則中書外書而雜取歲時薦易籤帙甫終解成周王會之篇因為憲令繪湘東貢職之事匪獨形容方屬彙之上聞荷賜名之下賁恭覽天題之命仰探聖蹟之淵曰華戎所以示南北之情通曰魯衛所以表親鄰之意厚信者久而不易錄者盡而不汙兼三義以名篇掩二中之善志謙抑冠百王之表威懷盡四海之歡是謂信書煥乎國策臣荒屨有素紬絳無功識謝營平因通知於邊事學慙伯始幸纂續於漢儀固多疎括之尤莫盡聖神之蘊將塵乙覽預集汗顏冒瀆冕旒臣無任

謝支賜

臣今月日准樞密院劄子以臣近上表進呈華戎魯衛信錄二百二十九卷事目五卷奉聖旨特賜銀絹各一百五十兩匹者輯百年之案籍甫上奏篇出九府之貨財猥加庶錫顧編摩之效溥荷獎飭之恩隆捧對以還兢惶靡措伏念臣技能素寡識致甚迂早探六藝之科未達四方之畧昨承認旨俾詮次於信書歷攷前聞僅裁成於類例敘朔漠講和之事雜鴻臚典客之儀規撫志稟於淵衷論著漫殫於庸力汗青云畢漏目固多但虞稽誤之誅敢覲使着之賜伏况撫和中外本

聖世之治功紬繹簡編乃文儒之常職詎謂偶緣於任使遂蒙推假於寵光賚物  
有加揆勞非稱雖忍慙而祇受終撫事以增憂比蓋伏蒙皇帝陛下天覆萬邦澤  
流四海以威懷御蕃國以恩信禮使人率用舊章垂為永制尸臣無狀之纖塵涓  
露之功賞典過優厚貴帛繅金之品既被匪頒之渥益思報稱之宜惟竭力於股  
肱冀收功於簿領仰酬樂育誓畢餘生臣無任

進元祐編勅

臣某言竊以法不獨立必由聖哲之有為今出惟行當重變更之所始時屬休明  
之運氏漸寬厚之仁仰奉淵謨克新治典臣等聞古者民樸而事約故弼教之刑  
流宥惟五及乎俗易而風移故用中之典輕重以三事隨世而屢遷文因情而互  
起自唐興訖乎顯德其律令格式俱載於簡編由國初至於元豐其制勅禮書悉  
藏於官守章程時易巧偽日新峻其隄防乃有滋彰之敝緩其銜策又多抵冒之  
虞昔為使者或閱於今近所利者或違於遠舊文未具新例更生今每戒於茶頰  
事固難於毛舉取其宜於時者由是變而通之或革或因至纖至悉恭惟皇帝陛  
下太皇太后陛下道熙天綽智燭物情紹休六紀之光損益百王之際以謂疏律  
著今皆欲傳之無窮正本清源遂可措而不用雖祖宗之制具在而習俗之變靡

常正律傍章壹有滯疑之論寄情他比漫成破析之繁不有刊刪孰從折中宜乎本朝以為先務二聖為之盡心慎簡乃條總領其事置司率屬將訂正於煩苛據舊鑿新俾發明於義類臣等奉承詔旨繕閱舊章於是以元豐勅令格式並元祐二年十二月終以前海行續降條貫共六千八百七十六道兼取嘉祐熙甯編勅附令勅等講求本末詳究源流合二紀之所行約三書之大要彌年權撫極慮研窮稍就編滕粗成綱領隨事標目用舊制也以義名篇倣唐律也其間一事之禁而有數條一條之中或該數事悉皆類聚各附本門義欲著明理宜增損文有重複者削除之意有闕畧者潤色之使簡而易從則久而無敝又案熙甯以前編勅各分門目以類相從約束賞刑本條具載以是官司便於檢閱元豐勅則各隨其罪釐入諸篇以約束為令刑名為勅酬賞為格更不分門故檢用之際多致漏落今則並依熙甯以前體例刪修更不別立賞格又以古之議刑必詢於眾漢以春秋斷疑獄發自仲舒唐以居作代肉刑成於洪獻復有國人奏請隨事立條謝報實繁去取尤慎曩時條熙甯勅止據嘉祐舊文元豐勅亦只用熙甯前例增損刪定更不參攷日前創法改作之意今則斷自嘉祐至今凡二十餘年海行宣勅及四方士陳述利害參酌可否互有從違又以人情多辟法意未周須藉增裨乃為

完密考東郡之議應劭有臣所創造之言按慶歷之書羣官有參詳新立之例今來勅令式內事有未備與刪定官等同共討論具為條目者即依慶歷故事注日臣等參詳新立又以法令所載事非一端郡縣省臺紀綱繁委前紀所述皆有別書魏律則尚書州郡著令自殊唐格則留司散頒立名亦異皆所以便於典掌不使混淆其元豐勅以熙寧勅令中合入尚書六曹在京通用並一路一州一縣事並釐歸逐處若盡收還慮致叢脞今只以該五路以上者依舊修入勅令其餘有事節相須條制相類可以隨事生文不須別條立法者雖止該一路一司並附本條編載又有專為一事特立新書若景德農田慶曆貢舉皆別為條敕付在逐司今元祐差役勅先已成書並近歲專為貢舉出使立條者既不常行遇事即用並已釐出不使相參其有一時約束三省奉行廢置改更蠲除省約既闕治體須俟僉用大則奏稟於清衷次則諮議於執政既有定論咸用著篇又紫刑統錄出律內餘條准此附名例後旁舉諸條各以類見今亦以勅令中如此例者六十四件別為一篇凡刪修成勅二千四百四十條共一十二卷內有名件多者分為上下計一十七卷目錄三卷令一千二十條共二十五卷式一百二十七條共六卷令式目錄二卷申明一卷餘條准此例一卷元豐七年以後赦書德音一卷總五十

六卷合為一部如得允當即望降勅彫印頒行仍乞以元祐詳定令式為名所有元豐勅令格式並元祐二年終以前海行續降條貫及前來詳定重修編勅所闕出熙甯勅天聖令附令勅並熙甯元豐申明勅前後申明散勅及一時指揮等已降新書收載者更不行用不係收載者各各依舊法其元祐三年正月一日以後海行續降條貫自為後勅施行若乃勅著罪名令存禁止應於典則盡載式文世重世輕蓋亦隨時之義先庚先甲庶乎已日乃孚倘賜俞音立為常制則官司奉憲無穿令斷律之譏郡國承流有操刀執繩之戒臣等昧刑名之學乏將明之才誤被選掄服勤紬繹湯緩期於歲月愧無補於毫分所冀刑清吏端少助教龐之化網疎禁闊彌彰宏遠之規塵瀆冕旒若蹈淵谷其勅令式等五十六卷並看詳二百卷共二百四十六冊謹隨表上進





蘇魏公文集卷四十五

宋太子太保右僕射同中書門下平章事司空魏國公蘇頌撰

逢年

高孫萬靈重禁

表

耀庭

進乾元節功德疏

臣某伏以虹流協祉駿發於睿圖雲爛當期肇隆於聖旦屬正陽之紀月邁元聖之誕辰夷夏均懽旒倪共祝恭惟皇帝陛下祇承大統覆育萬方開隆億世之基契會千齡之遇華封有禱咸傾向日之心神爽無疆永固如山之壽臣竊分列守幸際盛期恭祈龍象之庭增集天人之福冀分覺力俯鑒丹誠臣無任

又

臣某伏以天命有開帝圖惟永是生元聖敷佑斯民當赤耀照室之辰屬嘉瑞乘陽之序誕承丕構累洽泰甯神人鼓舞以均懽山岳喧呼而效祝臣仰陶盛化叨守近封將獻壽於南山廼投誠於西竺就嚴紺宇預集禪流啟百座之清場演五時之淨教薰修敢怠誠懇必精允繫最上之緣願益無疆之算臣無任

進乾元節絹

臣某言伏以乾陽膺月震誕紀辰帝齡願祝於天長職貢敢修於匪實前件絹繭絲絛賦機杼非精蓋充任土之常用表頌葵之志獲陪旅玉有瀆宸階臣無任

慰仁宗皇帝上僊

臣某言此者上天降禍大行皇帝奄棄萬國伏奉遺詔摧裂五情臣某中謝恭以大行皇帝聖德仁明超貫前古臨御天下四十二年外無佳兵之虞內絕威刑之弊誠格異域恩結人心奉諱之辰率土震慟伏惟皇帝陛下孝思罔極聖情難居永慕纏綿何可支抑臣恪守支郡阻遠闕庭限以表天

賀英宗皇帝登極

臣某言伏觀詔書恭承皇帝陛下以四月一日遵奉遺制光臨宸極者上天寶命集我皇家本朝慶靈鍾於嗣聖當重明之繼照慰萬宇之宅心凡在含生莫不同慶臣某中賀伏惟皇帝陛下紹四聖之丕緒對千齡之盛期爰自震闡入奉正統丕承之始洪化維新天地神祇永依於有道華夷動植咸戴於深仁百靈以和海大定臣叨職近序荷知先朝恭聞德音欣逢盛際一麾在外顧官守之方拘萬玉盈庭赴班聯之慕遂企戀朝闕飛馳精誠臣無任

又

臣某言伏奉詔書皇帝陛下以四月一日遵奉先猷紹登寶位凡在臣庶永有依歸靡限華夷舉同欣臨臣某中賀伏以上天眷命我祖宗所以肇基圖本朝慶靈惟聖哲所以膺統業屬明兩繼承之日副羣生欣戴之心大號惟新百靈同慶伏惟皇帝陛下天挺明德神贊淵謨恭孝夙展於君親英睿早聞於遐邇爰自震邸入奉乾綱踐祚之初天人之符斯協德音所被雷雨之施惟均萬邦咸懷九鼎增重有以見列聖流光之厚先皇知子之明善繼善述之謨實超於古昔丕顯丕承之烈佇載於典墳臣預職書林忝麾甸服仰邁重光之運親承渙汗之恩樂與吏民共慶風雲之會限拘印綬無階朝闕之趨臣無任

謝英宗皇帝即位大赦

臣某言伏奉四月二日制書可大赦天下當赦不原者咸赦除之臣即時集本州官吏軍民宣讀告諭施行訖者風雲會而聖人作雷雨解而品物榮自邇及遐以喜以抃臣某誠歡誠喜頓首頓首伏以人君發惟新之號所以麗澤於四方赦令出非常之恩故能鼓舞於羣動蓋春秋貴謹始之義而典謨重肆眚之文憲章具存今昔豈異伏惟皇帝陛下荷天明命應運動興丕承先帝之謨光臨大寶之位

乃於踐阼之旦誕布好生之仁刑無大小之差悉從原宥官無內外之限咸與躋  
遷軍和遍被於殞寤民里周蒙於隱恤舊章畢舉美利無垠人神為之交懼陰陽  
以之順序臣叨守州郡親遵盛明伏讀詔書有祇率舊章之言又有罔敢廢失之  
戒竊謂陛下虔恭遺旨善述先猷足以感動人心馴致孝治凡在臣子孰不歡欣  
昔帝堯能放上世之勳成王能酌先祖之道書詩所以稱載聖賢所以詠歌較於  
茲辰未為遠過昇平之源可見其盛之德在茲丕基益隆萬世永賴臣限以官守  
不獲稱慶闕庭臣無任

謝勅書撫問

臣某言六月二十九日供備庫副使京西路告諭曹繼明到州伏奉四月十一日  
勅書一道臣及本州官吏軍員將校僧道百姓等伏蒙聖慈特賜告諭並傳宣撫  
問臣即時稟受施行訖者先皇厭代百姓深喪考之憂嗣聖纂圖萬物荷由庚之  
澤矧次甸圻之近首霑雨露之恩布告俯聞悲歡交至臣某中賀伏惟皇帝陛下  
體乾居正繼照代明念綴衣顧託之難思大器置安之重是以初臨寶阼爰軫慮  
於通遐臨遣使臣俾慰安於兆庶皇華所泊丹詔載宣惟郡邑之吏民逮屯防之  
師旅側聆天語親見王人莫不感抃於階庭妥甯於閭巷以孝而治德既形於四

方丕休其謨功遂流於萬世臣叨分麾守躬被綸言愧無能吏之資上符朝寄姑稟細書之訓下慰民情伏限州印拘縻不獲趨赴闕庭臣無任

進賀英宗皇帝登極絹

臣某言伏以千齡接統屬聖嗣之膺期萬國馳心奉珍財而入贄臣叨聯朝序獲假州符敢陳實篚之儀冀效傾葵之志前件絹出於機杼賦自屢廬蓋任土之所宜愧充庭之不腆輕塵罕旅有濟典彝謹遣男習應鄉貢進士舉嘉管押詣闕庭上進干瀆宸嚴臣無任

賀光獻皇太后受冊寶

臣某言伏審祇嚴先制誕受鴻名凡在生成率均慶控臣某中賀伏以皇太后陛下坤元配德陰教移風輔先帝之憂勤廣睿圖之延永荷推尊於徽冊已正位於東朝內治久行比屋皆循乎婦道仁功潛被萬方寅奉於母儀夷夏同歡人神有賴臣守職列郡不獲隨例展慶闕庭臣無任

賀太皇太后受冊寶銀絹

臣某言伏以繼祖尊親式頒於顯冊承顏盡孝祇薦於鴻名凡處列邦率虔貢職前件物出於地寶賦厥機工雖非川岳之奇竊效土風之獻充庭不腆發幣惟慙

賀皇太后受冊寶銀絹

臣某言伏以禮冊推崇母儀增重一人達孝首務於尊親萬國歡心式虔於修貢前件物惟金稱美厥篚充名敢因方物之儀願旅王庭之實懇誠斯在聳扞良深  
慰仁宗皇帝陵廟禮畢

臣某言得本州進奏官狀報伏承大行皇帝靈駕以十月二十七日遷座永照陵神主以十一月四日外祔太廟第八室者萬邦永慕痛仙馭之不留七月如期愴壽宮之永閔凡在臣子孰不推傷臣某誠悲誠咽頓首頓首伏惟皇帝陛下純孝自天至神紹統繼述之心非怠葬祭之禮以時錮以南山遵霸陵之儉約祔於宗祏致清廟之肅雍事出宸衷風化天下臣叨聯閭藉限守州章荷兩朝樂育之恩未酬塵露望百辟駿奔之列如隔霓霄感咽自中涕洟交集臣無任

賀同天節

臣某言伏以月紀純乾日躔上宿渚虹樞電夙開載誕之祥神策寶圖繼撫重明之運臣某中賀恭惟皇帝陛下秉六陽之嘉會紹五聖之貽謀欽明文思道軼帝華之盛淳輝惇大世光爰歷之長屬臨出震之辰茂對乘離之祚函生均慶拱極同歡臣忝守維藩欣逢慶節九賓就列方拘北海之符千里輸誠願獻南山之壽

雲天在望魂爽飛馳臣無任

同天節進功德疏

臣某言伏以四月維夏聖人應世而挺生萬壽無疆天下傾心而致祝叨分遠守  
甫屬慶辰恭趨龍象之庭預集縉黃之侶誦貝多之典願皇圖符仙劫長延諷蓋  
簡之文冀聖歷與亦明共永歡呼斷嚮倍萬等倫臣無任

同天節進銀絹

臣某言伏以上聖題期甫邁社鳴之旦庶邦述職虔修岳貢之儀前件物賦自土  
毛珍非地寶千年嘉會庶歸宰旅之常萬壽無疆願協封人之祝臣無任

又

臣某言伏以德水澄瀾適邁聖生之旦侯封任土並趨王會之期虔奉舊章恭輸  
菲幣前件絹繭絲紋賦機紵非工蓋效土風之宜庸歸宰旅之心心存魏闕姑因  
物以達誠人比華封更望雲而致祝臣無任

賀興龍節

臣某言伏以月匝星回迨隆冬而成歲虹流雷繞啟元聖以開祥天道久而四時  
成聖人作而萬物覩臣某中賀伏惟皇帝陛下體乾嗣歷出震繼明宅九州四海



之尊契千載一隆之運無為而守至正稽古而若大猷海寓治安神人協慶適紀  
吹銅之候肇開貫昴之祥於萬斯年共聽嵩呼之遠俾富而壽咸傾華祝之誠臣  
竊食宮祠便居廬里未改向陽之志徒懷存闕之心上金鏡之篇顧慙於往哲續  
南箕之算采切於愚衷臣無任

又

臣某言伏以上聖膺期本神明之幽讚元冬建丑會日月之初躔運符龍德之興  
節紀虹流之旦言遵舊典恭敷殊庭丕宣大洞之科仰續後天之算伏皇帝陛下  
睿智神武靜遠疏通因天瑞以紀元布君網而契道現亦明之華景夙顯祥經  
營碧落之真祠適臨誕日臣久塵位著退老邱園望冕闕以天遙對靈場而心禱  
覲憑妙果式薦丹誠皇帝陛下伏願玉歷延鴻金枝衍慶舜循堯道虞書永協於  
重華周以宗強文子更登於二五藩輔保維城之固幅員臻莫枕之安凡在含生  
普同上願臣無任

又

臣某言伏以日月會於星紀肇開甲觀之祥富壽祝於聖人敢效華封之請集陽  
寥之靜眾諷龍漢之秘文冀憑神寶之威靈仰贊地圖之永久皇帝陛下伏願凝

神太紫獨化陶鈞無為無事而造道之真卜年卜世而過周之懸御雲旦旦歌天地清甯之功瓜瓞綿綿享子孫千億之慶凡屬覆臨之類率同斷嚮之誠臣無任

興龍節進功德疏

臣某言伏以建丑地正當萬物紐牙之際上弦月宿邁九龍浴聖之期驗星紀之初躔著倚闈之令節雷樞虹渚乾坤開靈命之符綏帶絲囊朝野著歡康之盛凡居戴履共效祝延臣某中賀伏惟皇帝陛下膺淳耀之烈光宅高明之大寶無為而守至正稽古而若大猷疊穆顯昂靜淵寅畏丕承先志集下武繼文之勲躬祝上神遵嚴父配天之禮屬誕彌之在旦紀嘉會之發祥地平天成仰一人之有慶嵩呼華祝見萬國之歡心臣葵藿微生江湖遠迹徒切向陽之戀阻陪獻壽之班上金鏡之篇顧慙於前哲吞琳宮之職輒奉於真科冀憑道力之希微遠續帝齡之億萬臣無任

又

臣某言伏以星回於天紀季冬之上八帝出乎震嗣梯歷以無疆偶千齡降聖之辰會百辟稱觴之旦踰瞻堯闕限層域之九重祇款殊庭奉華封之三祝恭惟皇帝陛下太微毓粹淳耀膺期聰明睿智以有臨禮樂征伐之自出雍都獲受命之

寶玉顯國祥西母獻益地之圖屢歸戎捷考六義無以形容盛德備八音不足褒贊成功姑宣碧落之靈風上慶虹流之誕節皇帝陛下伏願乾坤齊泰日月並明御氣辨以調元建中和而立極天授神策萬世福以迎休妣嗣徽音百斯男而集祉民樂延康之化時颺保定之歌凡處覆臨皆同鼓舞臣無任

賀神宗皇帝徽號

臣某言得本州進奏官報今日增上神宗紹天法古運德建功英文烈武欽仁聖孝皇帝徽號者敷揚國典祇告禰宮聖孝丕昭登明遠布臣某中賀臣聞帝文皇質傳言兼美大之稱乾始坤生易謂備元亨之德惟先帝之道豐仁洽邁前王之治定功成增上鴻名丕宣盛烈恭以神宗紹天法古運德建功英文烈武欽仁聖孝皇帝德貫三極恩浹九區興隆典而振宏綱耀德威而驚荒裔達聰明目昔其盛德而無以加寬役勗農斯皆上古之所不及雖經文緯武之號已著而繼天稽古之業未彰皇帝陛下明發有懷孝思維則敬上世之道繼彼三墳照下武之功施於萬禩銘勳簡冊展事宗枋煥九廟之輝光副羣倫之屬仰臣早塵近列獲侍先朝恭聆大告之行竊深感抃限有一官之守阻預慶班北首闕門臣無任賀奉安神宗皇帝御容

臣某言廣曲密之仙都俯鄰軒宇宅顯昂之遠表如見堯牆瞻棖棟之維新仰威靈而如在臣某竊以天子之孝莫大於尊親朝廷之儀無先於備物方聖主推崇於禩室本先皇肇建於崇宮增大塊垣聿嚴肖貌余酌事存之訓茲為善述之謀伏惟神宗紹天法祖運德建功英文烈武欽仁聖孝皇帝聰明文思淵泉溥博接千齡之統紀紹五聖之基圖臨御於一十九年之間制作以之詳盡損益乎三五六經之際聲明由是昭彰邁遐武於往初順詒謀於永世伏惟皇帝陛下紹休盛烈循致至平每懷優渥之恩將極褒尊之典謂宣光之隆構制有未周闕顯承之重檐禮惟其稱爰屬告遷之旦恭行妥侑之儀陳六寢之几筵竚臨燕息履四時之霜露間奉烝嘗曲全至備之情文期盡先王之愛敬發揮鴻業垂裕多方臣昔事先朝早塵近烈講漢家之故事嘗預咨詢望渭北之衣冠莫違奔走北首京闕內切肺膺臣無任

進裕享絹

臣某言伏以大裕之享盛世宜行申至孝以告虔罄函區而述職臣叨居下土仰觀純儀敢修貢篚之誠庶備充庭之末前件絹素惟州產出於民租冒瀆宸嚴臣無任

賀擇皇后

臣某等言伏奉聖旨云云伏以塗山啟夏涓埃興周予娶於度土之辰親迎於造舟之地若稽盛典適契亨期將開前寢之模宜謹曲臺之議臣等中賀伏惟皇帝陛下天錫仁孝日新光明躬親萬幾雖崇東朝之訓表帥九御尚虛中壺之尊伊欲迓於家邦必先正其服位太皇太后陛下念宗祊之奉篤風教之先應詢慶門咨求淑媛將協定祥之兆當陳備物之嚴嘉命惟行體二儀之辟合舊章可舉在六禮之親成自納采至於告期由命使訖乎上禮車服有等幣幣有常古今相沿方冊具載臣等不勝大願伏望誕頒明詔預勅奉常考沿革於前王參節文於通禮制為成式付之有司袞冕殺圭益重敬昏之義金根驪馬悉全象物之宜足以彰有命之自天知得賢之配聖靈承億載流化萬分凡在懷生率同大慶臣等無任

慰宣仁聖烈皇后祔廟

臣某言得本州進奏官報伏承宣仁聖烈皇后以二月十七日升祔英宗皇帝廟室者復土厚陵甯神宣廟仙游益遠聖孝無窮臣某誠悲誠咽頓首頓首伏以宣仁聖烈皇后母儀三朝君臨九載佐萬機於房闈治協不平祔六世於宗祊禮尊

配侑恭惟皇帝陛下聿懷祖德永慕慈儀喪過乎哀日月倏踰於祥禫祭致其敬  
歲時克奉於享嘗臣藉綴殿塗躬縻州組舉朝哺之臨阻預朝班望雲日之遙但  
馳魂幹臣無任

賀奉安宣仁聖烈皇后神御

臣某言得本州進奏官報今月八日景靈宮徽音殿奉安宣仁聖烈皇后神御者  
闕宇殊庭甯神英寢禮成盛旦化被多方臣某伏以太姒徽音企仙遊而已遠闕  
宮有恤奉慈範以如存備法駕之祿威越儀坤之往制伏惟宣仁聖烈皇后厚德  
載物正位承天三朝尊奉於母儀十載輔成於聖政不出房闈憂勤見於動言以  
御家邦教令行於中外皇帝陛下躬有虞之克孝慕辛國之維行霜露感懷嘗蒸  
具禮仰視榱棟既巖七室之祠出游衣冠更具四時之薦斯盡享親之義兼隆尊  
祖之誠宮廟相望人神胥叶臣近司舊列昔更事於簾帷遠守餘生阻趨陪於班  
著北首京闕內切肺腑臣無任

賀紹聖二年明堂禮畢

臣某言闕九筵之太寢奉三歲之親祠熙事訖成湛恩普被曠然麗澤浹被寰區  
臣某中賀伏以嚴父配天所以教諸侯之孝普災肆赦故能得萬國之歡慶逢極

治之辰交舉上神之薦爰推大賚悉舉舊章咸與維新無遠弗屆恭惟皇帝陛下  
以乾粹離明之德兼堯仁舜孝之資祇栗寤興敬恭明察念饗帝享親之義思盡  
志盡物之誠日至墻茨於泰壇間行大報享秋奠玉於陽館復舉彝儀郊廟之祝  
畢修雷雨之施咸暨稷穰降福集帝祚以無疆嘒嘒懷生樂聖時而載扞臣圭符  
守土淮海靡軀初不獲駿奔明庭躬修助職今乃幸親承疾置宣布恩書姑與吏  
民俯同踴舞

賀紹聖三年元會

臣某言伏以講歲首之儀重元正而謹始受春朝之籍罄四海以來同方三隅交  
泰之辰寔萬物棟通之候函生胥慶景福維新臣某中賀伏惟皇帝陛下繼聖曆  
期持盈守位積神智天仁之美致功成治定之隆七政以齊四時合序肇屆履端  
之旦躬臨正宁之朝鐘簾充庭衣冠就列梯航重譯傾眾星拱極之心椒柏稱觴  
同萬壽無疆之獻臣職忝真館恩假便居想八闕於鈞天幾形夢寐望九賓於漢  
殿莫聽臚傳仰祝帝齡漫馳魂幹臣無任

賀立淑妃劉氏為皇后

臣某言伏聞九月二十七日文德殿發冊寶皇后成禮者建大長秋之官屬仰奉

四聖之居進內司服之禕衣丕成三冊之命儷尊稱於皇極崇位號於中宮慶集  
宸闈風行寓縣中外臣庶鼓舞欣歡臣某中賀臣聞自古守文之君必有內德之  
助二南正始之道是為王化之基蓋以祖宗廟之祿將化天下以婦道嚮非合成  
湯之法相何以配上帝之正妃允茲椒掖之賢茂對紫庭之遜恭惟皇帝陛下憲  
章文武效法乾坤愛敬曲盡於兩宮仁恩溥洽於四海卓有倪天之貴夙膺履武  
之祥翁受純禧協敷陰教彤管有煒既昭則於九嬪象服是宜將垂福於萬世臣  
早塵班著老退江湖欣聆郵置之傳竊贊家邦之美天枝繁衍式符周繼之綿綿  
國本延長更祝軒邱之五五伏限在遠不獲奔走闕庭臣無任

賀生皇子越王

臣某言伏觀德音八月八日皇子降生者大人繼明增煥前星之象長子主器肇  
開甲觀之祥夷夏宅心邇遐均慶臣某中賀伏惟皇帝陛下恩被動植孝通神明  
錫其德音若重華之協帝措之事業同下武之繼文是宜蒙天地之休於以篤家  
邦之慶延仲秋之今日寔上嗣之膺期嘉瑞藹乎宮闈湛恩浹乎寰宇龍犀日角  
已彰歧嶷之姿海潤星輝永副元良之望臣早塵班著老退邱園請聖人之多男  
允諧華祝上天子之萬壽徒效嵩呼雖阻奔馳深深蹈詠臣無任



元符三年慰哲宗皇帝上仙

臣某言此者上天降禍大行皇帝奄棄萬國伏聽遺詔推裂五情臣某誠頒誠擗頓首頓首恭以大行皇帝睿智聰明繼志神考德威烜赫瑞應屢臻四夷八蠻罔不率俾仙遊厭世宮車上賓率土哀號孺慕悲切伏望皇帝陛下天倫至愛聖情難居追愴感懷何可開抑臣限以老病退居閭里不獲奔走道途赴哀班次臣無任懃欽聖皇后上仙

臣某言伏觀今月十四日大行皇太后遺詔凡在臣庶罔不悲號臣某誠哀誠咽頓首頓首恭惟皇太后母儀三朝化被四海復辟嗣聖歸神昊穹皇帝陛下追慕慈悼悲纏宸極孝思深切聖情難居伏望以宗社為懷副寓縣所望少抑哀抱以納福休臣嘗預近班屬在羸老不獲奔走道路赴哀班次臣無任

熙甯賀斷絕大理

臣某言竊以國圖空虛周美成康之盛禁網疎闊漢稱文景之隆蓋教化行而俗醇則刑罰措而民服視今之治與昔為侔恭惟皇帝陛下出震垂裳乘乾御極不事征伐攻取以懷殊俗不重賦斂絲役以惠中區草木魚鼈之微霑濡盛德馘寡孤獨之賤蒙被深仁上日甫臨方春啟序治象未出而億兆皆勸寬詔未下而煩

苛已除廷尉無奏讞之留聖政有勝殘之善臣仕逢熙代職忝從臣未能發言為詩掄揚於樂府誠欲直書其事炳煥於史編上件斷絕公案欲乞宣付史館臣無任

謝欽恤刑

臣某言進奏院遞到勅書一道賜臣欽恤刑獄臣即時依稟施行及翻錄下管內諸縣去訖者曠吏可畏聖慮遐周沛然發於德音欽哉恤於刑辟下逮容繫咸識天慈臣某中謝伏以國家恭授四時慎用三典每當盛夏之際俯念幽囚之拘內則齋室親臨閱攸司之讞議外則使軺案問戒羣吏之煩苛詔書下而寬和禁罔號為陳閩蓋累聖恤人之厚為盛辰致治之源恭惟體天道欽文聰武聖神孝德皇帝陛下仁育含生施俾洪造憫庶民之多辟致五聽之猶繁顧茲叢棘之間或有然灰之歎於是爰周時訓敷述邦彝頒一札之璽書勅四方之守長俾親庶獄毋忽一例加慢飾於園牆乃溉濯於闕木疾病者賜之醫藥憫獨者給以體康情可哀矜皆從於末減治當證逮亦戒於淹期恩生囹圄之中歡洽幅員之內茲其盛德流於無窮臣任忝守封職當持法親承聖訓敢怠於布宣周察民情務歸於寬簡冀盡平反之效少紓中良之懷臣限守州符不獲奔詣闕庭臣無任

又

臣某言盛德在火式臨縕暑之辰至仁如天爰念拘縲之黨特頒深詔訓飭多方本睿慮之好生致函靈之決慶臣某中謝伏以國家千齡接統累聖題期哀庶獄之尚煩恐一夫之失所罪之疑而輒讞情既得而猶矜乃屬流金之爻載寬叢棘之禁率由欽慎以底治平恭惟皇帝陛下駿邁先猷稽叅洪造廣虞舜恤刑之治推成湯扇暘之心顧茲園土之間或興畫地之數講明常憲敷布德音勅守長以奉承使容繫之清肅濯其枉奉塗燬垣墻視皿器之必時蠲藥劑之無關重輕之繫必致於安全小大之情不罹於冤滯臣竊分符竹寅奉教條知禁網之闊疎維思止辟味訓辭之深厚敢曠承流庶無暴戾之尤仰副憂勤之念臣伏限印章所繫不獲遠詣闕庭臣無任

又

臣某言璇璣齊政時臨建巳之初皇極敷言上念惟刑之恤祇誦寬和之旨內深惻隱之懷臣某中謝伏惟皇帝陛下乾健乘時離明燭理布炎帝執衡之令軫武王蔭暘之仁內則省錄於齋居不忘庶慎外則丁寧於守吏爰下細書順長育於正陽俾肅清於巖棘情已得者仍從讞法惟不逮者悉免稽留至於飢渴疾庾之人咸有厚給醫治之惠號令出而民說協氣旁流勾園靜而星虛繫刑幾措臣忝

分州寄恭被訓辭出繫挺囚姑稟夏時之政承流宣化更勤漢守之忠惟竭疲篤  
仰酬生覆臣無任

又

臣某言盛德在火天開長育之辰折民惟刑聖有衣矜之訓被詔辭之深厚諭上  
旨之丁寧恩逮狴牢惠均遐邇臣某中謝伏惟皇帝陛下躬禹律度畫堯衣冠德  
教洽而刑罰清誠意修而上下察適紀朱明之候誕敷在宥之仁念五聽之所求  
雖存彝憲慮一夫之不獲常軫淵衷時勅守臣奉宣明令簡核多從於原省瘼飢  
悉務於安全廩餉以時寒涼適節歡欣動於幽繫恥格變於編齊漢網甚疎固有  
舟魚之漏召棠所及將消牙鼠之爭臣叨析左符親承細札對時育物仰遵共理  
之言出繫挺囚上廣好生之德敢忘盡瘁少答鴻私臣無任



蘇魏公文集卷四十六

宋太子太保右僕射同中書門下平章事司空魏國公蘇頌撰

逢年

高孫萬靈重葺

表

耀庭

哲宗皇帝明堂宿殿起居第一表

伏以商飈應律式嚴宗祀之期法駕鳴鑾出說齋居之次伏惟皇帝陛下聖能饗帝孝極顯親考制度於國陽肅陳備物致精明於殿幄內盡誠心臣初肄少儀阻陪熙事躬雖留於紫闈心竊嚮於丹墀

第二表

伏以昭配合宮形四方之孝治凝思正宇儼萬乘之威容伏惟皇帝陛下稽古守文憲天御極庶季秋之吉日躬嚴父之上儀精義感通交神明而有道至和充塞嚮福祉以無疆法駕在行天倪益固

辭免明堂加恩第一表

伏以需如春之澤滲漉於羣方推出綍之言增陪於多賦體仁恩之至厚眷涼瑣

以何勝中謝竊以嚴父配天本聖人之能饗布德行惠蓋王者之無私凡百辟之在庭遠九州之修貢從而加寵孰曰匪宜如臣者力僅勝衣學方肄簡左右就養早依禁闈之榮夙夜在公未踐朝闈之地例叨進律益負恩願伏望皇帝陛下堯日照臨湯雲覆護於其楫齒未堪國邑之多賜以俞音聽免綸函之拜由衷之懇得請為期

第二表

伏以命出惟行固難反汗賞如不借孰敢循牆蓋在義以當然故控誠而未已中謝伏以祭有十倫之義職或逮於翟闈國有千戶之封功必先於闕閱顧臣之分實愧於斯論職則不預於饗祀語功則未趨於班列猥當慶賜之澤懼有僥踰之譏抗章敢辭批札尋下既喻以明神之惠又示以惇族之仁雖仰戴於天慈終未諧於公議伏望皇帝陛下稽參多實詢考事功憐楫弱之無疴豈堪多邑諒忱恂之至懇聽罷設恩渠渠之誠喋喋是懼

明堂加恩謝哲宗皇帝表

伏以奉昭考而配上帝盛典斯行流厚福而浸黎元庶工咸洎內省屢享之質何勝爵土之榮受命彷徨臨深震揚中謝竊以祭有惠術蓋廣於神休官有攸司乃

霑於帝澤昨季秋之大饗紆上輦之躬行三獻禮成神明歆而福祉降肆赦恩普  
勲勞重者爵賞加詎容罔功例叨布德伏念臣寅緣天屬生長禁庭上承愛育之  
仁擢預公侯之列歲時朝請恕綿弱之未任宗祀肅雍復優容其不至逮茲拜慶  
實謂無名雖嘗列於共辭終莫回於渙令此蓋伏遇皇帝陛下明德恤祀重祿養  
賢爰頒雷雨之恩遍霑文武之籍在於蒙樞曷稱褒旌幼未有知嘗事斯語為善  
最樂莫上合於詔書俾躬處休幸長為於藩屏

謝皇太后表

伏以太寢總章宗祀云舉弱齡樞齒顯制誤加猶揆寵靈交深兢愧中謝竊以國  
家明德恤祀聿嚴報本之儀至誠感神茂介自天之祐始前期之潔齋逮昧爽之  
孚恩皆清蹕之躬行有庶工之陪相既畢上儀之舉宜膺大澤之均伏念臣資乏  
慧聽年方幼弱主上以同氣之愛加彼官封太母以含飴之慈重茲鞠育雖玷分  
茅之秩未陪奉玉之祠承言綽之嗣頒雖弁髦而不間良慙冒處罔獲牢辭此蓋  
伏遇皇太后殿下內德輝光母慈愛育峻儀中寢治早贊於正邦外位東朝道益  
光於佑聖加憐最質致錫龐恩學彼大成庶知潔己以進報茲罔極勉思就養之方

謝皇太妃牋



皇太妃宮閣德兼圖史愛逮宗藩躬朝禮於兩宮贊祀儀於正寧逮此配成之慶贊揚  
渙澤之優命數益崇頌侗豈稱責其智效雖未克於宿官習以性成尚可期於學政  
冬節賀哲宗皇帝表

伏以律中黃鍾驗一陽之來復天授神爽膺百福以攸同屬逢至治之辰允協踐  
長之慶中賀伏惟皇帝陛下紹膺淳耀纂嗣丕謨三靈昭眷命之祥遂臻治定四  
海盡榮懷之美播在詠歌順履良辰茂迎協氣臣承華雜鄂接潤仙源君恩等於  
乾坤敢言報稱國壽隆於翼翼惟罄祝延

賀太皇太后表

伏以復見天地之心象標至日律有陰陽之應氣始黃宮時肇初辰天開景貺中  
賀伏惟太皇太后陛下德超三母功被兩朝不下堂而教化成官師式序未窺牖  
而內外治朝野無私順履天正之休翕膺神貺之集臣生蒙鞠育幼被恩榮稽天  
保報上之言惟思孝敬行皇極錫民之義仰贊聖明

賀皇太后表

伏以天行反復應純乾初九之爻元氣回旋肇太極涵三之數紀為令節交舉慶  
儀中賀伏惟皇太后殿下敬德思任徽音超似受天下之養理極於尊崇應地道

之光功兼於持載順承天序茂對神釐臣貌在弱齡親承慈育願上萬年之聖壽庶同四海之歡心

賀皇太妃牋

伏以氣由子始星開珠璧之躔道至復亨卦啟地雷之象至和默會多福來同中  
賀伏惟皇太妃宮閤道協二聖化流六宮茂德內修早應壽房之兆慈儀上極不忘練服之謙氣序更新宮闈增慶某聯華子舍集慶宸居仰懷愛育之仁但祝延洪之祉  
年節賀哲宗皇帝表

伏以太皞司春肇啟發生之候青陽布政茂宣寬大之恩端朔迎祥人靈胥慶中  
賀恭惟皇帝陛下誠明充性禮義宅心日就月將益懋緝熙之學任大守重每懷  
祇畏之心嚮用純禧茂延景鑠臣幸緣天屬叨備宗藩劍佩肅儀未預大庭之會  
椿靈等真敢祝聖人之年

賀太皇太后表

伏以陽氣發乎童首品物更新斗杓正乎孟陬歲功云始遂行慶澤孰間華夷中  
賀恭惟太皇太后陛下天造覆民坤元生物躬先勤儉邁塗山興夏之勞嗣履齊  
莊越文母佐周之德屬肇更於春律諒協吉於時和臣幸邁休明叨蒙養育一元

之始方宣木德之仁億萬斯年願介春祺之茂

賀皇太后表

伏以寶歷更端時紀人正之首條風協序天開獻歲之祥品物惟新宮闈均慶中  
中賀恭惟皇太后殿下名高馬鄧德婉皇英古訓是依著彤管女圖之戒前修自  
警嘉素裝大練之風道迎上日之和茂對自天之佑臣地親禁闈才謝維城敢稱  
椒柏之觴仰祝椿靈之算

賀皇太妃牋

伏以璇璣觀運方齊七政之元椒柏稱觴式重三正之首風雲淑暢宇宙開明中  
賀恭惟皇太妃宮閣孝奉兩宮美全四德動中環佩之節謙尊而光居享羶鄉之嘗  
上安而敬適臨穀旦倍擁繁禧某童穉無知親憐是賴願介春陽之吉增延眉壽之期  
哲宗皇帝明堂宿殿大甬郡王起居第一表

伏以辰房朝覲屆明堂宗祀之期詔蹕書嚴謹宣室齋居之慮伏惟皇帝陛下追  
養繼孝敬神事天度以尋筵深廣應乾坤之策思其居處寤興忘夙夜之勞臣託  
庇禁局神馳法坐方佩左觴之飾阻趨鳴玉之聯

第二表

伏以世室嚴禋禮莫隆於報本瓊房祇祓道允契於集虛伏惟皇帝陛下昭顯先猷淳宗元祀四阿重屋倣體象之圓方太寢南闈致心思之精一言瞻帷帳阻侍典儀竚聞畢饗於欽柴即遂趨迎於還蹕

咸甯郡王起居第一表

伏以三歲親祠載舉國陽之禮五思致敬聿嚴聖饗之心伏惟皇帝陛下以舜孝事祖宗以堯文欽歷象明德恤祀潔牲玉之告虔唯道集虛通神明而有序臣竊懷幼志仰慕朝儀竚華蓋之天旋肅內班而磬折

第二表

伏以清廟明堂古史合五名之義路朝便坐聖辰躬三日之齋伏惟皇帝陛下欽翼宅心穆清凝命案禮經之宗祀祇事天神即陽館之嚮明昭配禰室肅整內心之美茂膺虛室之祥

普甯郡王起居第一表

伏以闡大報之宮對穹高而肆類告七世之廟奉文考以配神恭惟皇帝陛下奏孝天儀有懷明發謂物無以稱其德致志一誠惟神有感而必通荷天百祿臣勝衣忝拱拱著末由瞻雲日以馳情姑夙宵而在念

第二表

伏以歲物順成將展合宮之報宸輿夙駕載臨重帝之居恭惟皇帝陛下順考舊章誕修嚴祀規模九室祇崇陟配之儀齊定一心益盡交神之道仰天光之泰豫延帝社之嘉休

祁國公起居第一表

伏以太室歲儀展季秋之宗祀左房潔慮度三日之內齋伏惟皇帝陛下德清明九功昭序惟聖為能於饗帝緝典斯行嚴父莫大於配天先期以戒臣纔通方甲未習朝趨望咫尺之威顏阻晨昏之覲禮

第二表

伏以欽若昊天大舉三年之報稱秩元祀預修百順之名伏惟皇帝陛下誠致中和功躋巍蕩精名內固有盡志盡物之虔聖孝兼隆協饗帝饗親之美方履霜之在序想玉食之延休

大甯郡王辭免明堂加恩第一表

伏以陽館宗祈慶涓成於盛節雉庭孚號均嘏福於羣倫徽章例及於近宗叢質何勝於異渥中謝竊以愛之欲其富寔出至仁之心食之浮於人固有前經之戒

隆恩親而既過度分義以難安伏念臣弱甚蘭支華連棟夢有寶玉展親之賜乏大邦維屏之功寵靈已溢於平時僥倖敢期於嘉命踴高躋厚曷勝長育之慈履薄臨深祇益兢凌之懼伏望皇帝陛下天聰垂聽雲施無私深察叩心之誠許收渙汗之命昭大公於羣聽從所欲於微衷雖曰無知尚思自儆

第二表

伏以恭布由衷之懇既以報聞尚懷不盡之情期於必達蓋處富貴者欲其長守居高危者防於疾顛涯分或踰憂悔斯至中謝臣聞唐叔分相土之邑本以德封晉侯啟南陽之田亦由功賞在義則以為寵錫言禮者猶曰僭踰伏况臣方在幼齡未知宦學備數周藩之列蒙休堯族之親賜命增多省躬曷勝雖天慈篤愛遠追華萼之情而性資至愚深懼負乘之悔伏惟皇帝陛下刑家以及國制義而斷思念其本出於至情許以收還於成命傾心於此待報益虔

咸甯郡王辭免明堂加恩第一表

伏以大饗熙成祭澤普沾於率土陪封行賦褒章曲被於孱軀顧優渥之踰涯輒控陳而有請中謝竊以加地進律非有功而莫贖惟器與名慎假人而為寵賞如有僭受則為虛伏念臣絲弱薄才顛蒙寡識直茅擁節已兼華袞之資鳴玉奏章

未預外庭之謁遠茲裡慶例進戶田雖博施之無私敢冒榮而安處伏望皇帝陛下曲矜幼志時軫清衷收如綸出綍之言免濡翼在梁之刺庶安分守無玷龍光

第二表

伏以漚傾愚歎祈還益地之恩存捧批章重拜出綸之誨荷皇慈之至渥揆眇質以知慙情所未安義難自默中謝竊以無德而富前史之戒甚明受爵不辭詩人之譏尤切况臣以髫童之陋早歲蒙土宇之封大轟高牙位參師帥之列衮衣朱芾秩視公台之榮奉璋未接於時髦進戶例需於祭澤顧辱昧則爵既踰德受亦無功在朝廷則名以假人眾將啟寵永言及此豈敢違甯伏望皇帝陛下軒鑑照微堯旌聽眾下徇寡求之志庶無僭賞之差周遊繁言尚期可報

普甯郡王辭免明堂加恩第一表

伏以配天盛禮屬熙事之休成麗澤洪恩雖尸臣而畢逮顧無名而服寵輒滛懇以祈辭中謝竊以恩勝於義則處之有未安賞非其功則受之為不韙而臣自惟弱質未親保傅之嚴弗離禁庭已忝王公之貴伏况才非早慧學謝少成德祿不醕每有鑿庸之戒高明難處竊懷瞰室之虞何補盛時乃叨厚貺伏望皇帝陛下曲從人欲特軫天衷察其取少而辭多不為虛矯毋使貪榮而冒寵自速滿盈懇

款之誠矜憐是冀

第二表

伏以義有弗安輒具陳於前奏恩無與量猶未賜於俞音敢冒威顏更彈餘懇中  
謝臣聞功多而賞厚則下無覬覦德薄而位尊則盜思奪伐故聖人慎於賦祿而  
賢者戒於貪功寵或踰涯滿必招損伏念臣猥緣支屬曲荷眷憐生成皆自於禁  
中朝夕不離於上側雖帝舜之淳敘九族明皇之友愛諸王在臣所蒙方古已過  
若乃講三年之宗祀致四海之歡心慶未徧於有勞惠乃先於慈幼僉言靡協衷  
懇甯安伏望皇帝陛下徇羣議於大公抑私恩於內治聽從自列亟寢前褒俾無  
虛受之譏不累承平之化

祁國公辭免明堂加恩第一表

伏以嚴父而配天帝克享靈心受福以浸黎民布為皇澤恩猥加於蒙緝衷實負  
於愧惶中謝竊以三歲親祠禮成而雲施博百官顯相勞著者神惠加凡有褒封  
莫非公議伏念臣年纔髫鬣質本穎侗託庇宮闈之嚴僅親方甲之學未能佩玉  
致阻預於朝趨雖欲奉璋願不勝於祀事坐糜厚祿已竊重封更叨加地之隆深  
益循墻之畏伏望皇帝陛下廓乾坤之度回日月之明垂諒丹愚許從避免臣無



虛受僮下遂於素懷賞不私親亦少裨於聖治歷殫危款恭聽俞音

第二表

伏以愚衷惻怛批札丁甯雖螻蟻微誠莫動蓋高之聽而腹心至意甯虞再瀆之非中謝竊以國家若稽古昔之謨循踵漢唐之制徹疆啟土雖不涖於國都益戶增租實用酬於功闕而臣躬居禁闥秩視台司未陪鷓鴣之行弗預豆邊之事驟加多賦濫拜明綸茲謂無名詎逃顯責伏望皇帝陛下考至公之論盡羣下之情徧覆兼容誠曰大鈞之默運難進易退庶明小子之有知言已重陳日冀開可

大甯郡王謝哲宗皇帝加恩表

伏以盛禮休成允答上靈之貺湛恩宣布猥霑近屬之親願弱質之無堪冒隆私而過厚省循非稱震惕靡甯中謝竊以頌載魯封廣彼土田之錫雅歌韓奕美其畝籍之豐方朝廷加惠以懋功非勲德固難於虛受矧多與邑是謂濫恩伏念臣生質無奇穉齡未立託愛本支之末達辰信厚之時位已列於公侯跡未離於宮禁朝班阻造每慙車服之榮祭澤旁流更衍賦租之數懇辭莫獲拜貺何名此蓋伏遇皇帝陛下鴻化曲成至仁丕冒教由內而及外禮先親而後疎建爾國家奉丁甯於漢策莫如兄弟荷敦睦於周邦言綽所加愧芒並集誓謹春秋之教庶知

忠孝之方上報君親敢忘興寐

謝皇太后表

伏以天子居政教之宮宗祀上帝外朝臨象魏之闕肆青多方顧在弱齡均蒙異  
數辭不敢固制亦難稽中謝竊以嚴父配天本一人之孝治布德行惠致萬國之  
歡心方齋輅之歲儀有祠官之顯相奔走承序皆勤俎豆之恭慶賜遂行宜預絲  
綸之命如臣者粟資不厚賦祿已多未聞詩禮之方初尋保傅之傳寵踰三命位  
並五侯逮茲祭澤之頒復被戶租之賞載增封食深懼滿盈竊懷遜爵之誠莫遂  
循墻之懇此蓋伏遇皇太后陛下化刑宮壺德茂母儀當聖孝之親祠助夙宵之  
齋潔優推恩典實賴鴻私自惟輕薄之資未知報稱之所姑勤問學勉副生成

謝皇太妃牋

皇太妃宮閭以柔明之德當信厚之時奉順東朝風化行於遠邇佐佑皇極德施  
徧於親疎蒙陋何知恩章斯厚惟講求於義理期報稱於慈仁

咸甯郡王謝哲宗皇帝加恩表

伏以禮成宗祀廣推大澤之仁恩及藩臣均有爰田之賜辭榮弗獲臨寵若驚中  
謝竊以三歲躬祠莫大帝親之饗十倫重祭實先爵賞之施况聖上祇懷以事天

明合宮嚴配以昭考烈燎烟既達神靈並下而居敬渙號式孚卿士悉蒙於履進  
豈曲私於公族蓋賚予於善人僮異至公是為甯僭伏念臣年在髫鬣地處崇高  
初無宿晤之資早受懿親之獎上方嚴於將享躬不預於駿奔仰承加等之封自  
愧無功之賞此蓋伏遇皇帝陛下廓乾坤之量高卑皆在於函容均雨露之濡動  
植溥霑於潤澤惟茲慶賜攸謂異恩豈意頡侩適遭際會維屏維翰慙無賢智之  
名為龍為光徒有燕安之幸誓克勤於幼學期上副於淵慈

謝皇太后表

伏以禮嚴宗祀既格神靈之休恩廣大封猥加蒙稚之陋遜辭靡遂啟處不遑中  
謝竊以大孝尊親莫先於配侑聖人饗帝無尚於肅雍嗣講緝儀時惟大事方萬  
靈之儲祉有羣后之相祠誕錫言綸式彰惠術茲雖有舊詎及罔功伏念臣之秀  
嶷之姿偶熙平之運早膺典冊濫昇土疆握旒節之榮方有垂髫之愧相亘邊之  
事曾無在廟之勞豈圖慶澤之行亦沾恩章之及陪殿井賦增衍戶封循已踰涯  
拜嘉增愧此蓋伏遇皇太后陛下致誠育物昭德睦親奉先聖之詒謀佑清躬之  
秩祀眷福祺之丕擁思宗族以共承致乃幼沖有忝斯冒仰答生成之賜永勤忠  
孝之心

謝皇太妃牋

皇太妃宮閣道光柔順行著淑均有德有言佐先朝之內治以享以祀贊太寢之禮成茂推福禧致乃愚幼承祭之澤既荷賜於龐鴻報國之恩誓竭誠於未立

同安裔孫萬靈錫經

逢年舜畊

晉當耀庭

允恭子敬仝校字



蘇魏公文集卷四十七

宋太子太保右僕射同中書門下平章事司空魏國公蘇頌撰

逢年舜暉

裔孫萬靈錫經重栞

表

晉爵耀庭

普甯郡王謝哲宗皇帝加恩表

伏以禮行太室普饗帝親之尊命降外朝大卦文武之列願惟稚弱均荷寵光拜  
貺踰涯以榮為懼中謝竊以祭祀者有國之大事得其道則神靈歆爵祿者廟世  
之至權當其功則士民勸屬逢陽館之歲事爰逮端門之布常天表之應以善祥  
王言之出為大號凡在百位皆從享禮自匪有勞敢冒優渥伏念臣生非殊稟材  
謝夙成幸分慶於仙源早疏榮於節制假王封而述職曾未造朝望齋輅之親祠  
莫陪奉裸祇聽告庭之訓首膺加地之文育錫過優固辭莫獲恭承典冊如蹈冰  
淵此蓋伏遇皇帝陛下懷欽翼以事天克寬仁而濟物爰推惠澤廣布言休宗室  
近親獨愧誤恩之厚居家樂善願遵諄誨之言仰答鴻慈不渝斯志

謝皇太后表

伏以修講上儀推行惠術不間弱齡之陋亟蒙大澤之均辭寵莫違拜嘉增惕中謝竊以祭有惠下之義欲賞賤之悉周爵有等功之名顧重輕而必當矧合宮之大報紆清蹕之親行自王公洎於庶官有來而相祀雖宗室之需一命亦莫不在庭茲蒙渙汗之加是謂承神之既如臣者以至親受爵以在傳曠官荷鞠育於深宮獲奉承於慈誨方羣后肆覲既虧輯瑞之儀洎四海駿奔亦阻奉璋之禮而乃上同將相並進土田雖朝廷尚親許其尸祿而勿冲加命徒用厚顏此蓋伏遇皇太后殿下盛德在躬至仁及物愛憐諸子皆均壹於仁慈推贊鴻恩欲博施於上下始慙菲質莫稱優華但勤篤於進修莫不辜於誨育

謝皇太妃牋

皇太妃宮閣淑哲迪躬慈祥成德養殫四海方昭聖孝之隆朝事兩宮益厚教風之首愛均穉弱恩錫光榮敢忘志意之修上副獎提之訓

祁國公謝哲宗皇帝加恩表

伏以講三歲之親祠道迎景貺眷五宗之近屬均錫麗釐惟是童蒙何勝寵渥中謝竊以宗祀而配上帝所以昭文考之功大資而富善人所以法周家之訓況崇盛典茲謂曠儀劍佩列乎羣賢梯航來乎萬國既得天人之祐遂頒雨露之恩推

惠甚優非賢罔預伏念臣年方在處學未知方但循悅礪之勤阻奉圭璋之助真封廣賦荷加錫於原田需牘再辭終難回於渙汗此蓋伏遇皇帝陛下德侔健順恩被通遐祭則受福於神靈仁而敦睦於宗族勲賢並建固懋屏翰之良寵祿已盈更荷雲天之澤云何報稱乃副敦褒惟遵保傳之儀仰答君親之賜

謝皇太后表

伏以祭澤疏恩孚號肆章於海宇國藩增賦徽章不間於稱蒙拜貺殊優歲年豈稱中謝竊以開國之制周人分列於五侯是封之名唐室等差於千戶逮今賦祿視爵加田每緣慶賜之行遂有陪敦之數雖云並建於親戚亦將表顯於勳賢恩典所加官儀尤重伏念臣才微質薄屬近地親粵自勝衣即叨賜命銜昭晉穆已同啟於廟封沛易楚詩尚未從於師訓更被駿神之惠泛增多邑之榮匪以職勞坐蒙國寵此蓋伏遇皇太后殿下睿慈博愛聖度兼容親賢而憐無能式彰母道有澤則惠及下深助政經致茲誤恩曲加最陋敢不勤修志意靡怠晨昏冀少長之有成思靖共而守位

謝皇太妃牋

皇太妃宮閣儀刑宮壺愛篤王家因大事之熙成贊鴻休之溥博載循愚薄之稟



何預肅雍之陪例沐寵光自慙忝冒惟勤修於四術期少稱於萬分

大甯郡王冬節賀哲宗皇帝表

伏以周人建子以為正得天之統唐室稱觴而上壽如日之昇會聖旦之迎長協陽元之萃社中賀伏惟皇帝陛下繼承祖烈熙緝治功體堯舜之性仁恩漸有截法禹湯之論畧道契何言四氣均和百嘉茂嚮臣聯榮帝胄託屬天倫來復屆辰共慶光亨之運童蒙寡識敢忘善禱之心

賀太皇太后表

伏以一陽來復爰升君子之亨至性在中首重大元之本維時純祐允集清躬中賀伏惟太皇太后陛下厚德有容至仁能愛宅尊南面繼思齋之徽音協治泰辰成保定之大業茂迎穀旦擁佑丕圖臣越在幼齡承受育允茲逢吉仰二聖之重光願言揚休祈萬年之永祿

賀皇太后表

伏以學萌於子首六律以為陽運化至無當七日之來復惟天地之大德合春秋之一元中賀伏惟皇太后殿下子佐帝尊母儀邦教躬服幹濯德茂周南之風情存謙虛道邁建初之治天正協吉國社同休臣生長九重愛均諸子竊慶履長之

旦輒紓獻壽之誠

賀皇太妃牋

伏以仄飛縱室應嶰律之陽生表正候臺驗周圭之景至與時茂對同國安榮中  
賀伏惟皇太妃宮閣德蘊徽柔化存恭儉儀刑孀婦居忘修德之勞輔佐宮朝深  
念進賢之志漸迎長日永續修齡某屬預天枝親聯子行荷愛憐而均厚祝休祉以惟勤  
咸甯郡王冬節賀哲宗皇帝表

伏以日在北陸晷景至而萬福生斗行右旋天運周而四時正允屬光華之旦導  
迎泰定之祥中賀伏惟皇帝陛下睿德淵冲聖謨日就堯仁舜孝協至治於典墳  
夏質周文繼成功於禮樂丕成天序鞏固邦圖臣幼學未通嘉辰預慶獻履端之  
頌雖畧於舊儀贊鼎彙之祥竚符於萬世

賀太皇太后表

伏以六律正時黃鍾生於仲呂三微治歷卦氣起於中孚適丁來復之辰仰贊無  
為之治中賀伏惟太皇太后陛下母愛萬方君臨四表乾健坤順措國本於治安  
雷動風行運神功於語嘿履茲敷旦嚮彼多祥臣託質宗枝承華宮禁奉觴上壽  
仰陪亞歲之儀候景延暉願續履長之慶

賀皇太后表

伏以魯臺書物時當南至之辰漢瑄飛仄候應陽生之旦朝儀亞歲人慶履長中  
賀伏惟皇太后殿下婦順宮朝母儀寰宇勞心曲體藹然東觀之風求賢審官志  
在周南之化嘉辰集祉盛德咸宜臣幼未有知恩叨加命內切報親之念虔傾祝  
算之誠

賀皇太妃牋

伏以合璧連珠驗初躔於天部撞鐘擊磬動和氣於人聲履古以還茲辰為重中  
賀伏惟皇太妃宮閤位尊啟母慶襲堯門膺萬乘之承顏允隆孝治致九州之奉  
養克協親尊方庶物之含生宜萬靈之來相某聯榮子屬服寵藩封內深荷德之  
誠敢效祝年之請

普甯郡王冬節賀哲宗皇帝表

伏以雲物備書占有年之嘉瑞鼓鐘在列謹亞歲之盛儀羣姓丕冒於至和率土  
同頌於善禱中賀恭惟皇帝陛下順天育物稽古守文日就月將益懋緝熙之學  
陽舒陰慘不渝消長之期動靜得時福釐來舍臣分輝棟蓼託庇宸居神英效祥  
寔契聖人之壽祥風應律請宣太史之書

賀太皇太后表

伏以天施復於子冠三統以紀元日景正乎南驗四時之協序升平盛際遐邇傾  
心中賀伏惟太皇太后陛下德應直方施侔博厚臨朝端拱大凝帝載之熙措國  
居安坐視天民之阜一陽來復百順攸宜臣托陰慈仁承願左右物成歲美邁時  
運之維新地久天長祝睿齡之共永

賀皇太后表

伏以清臺課歷考星度於珠躔綈室飛葭候陽萌於玉琯繁禧所屆善祝攸同中  
賀恭惟皇太后殿下柔順積中憂勤宅志內修陰教不忘警戒之誠上正母儀思  
繼齋莊之德書雲納祉視履加祥臣夙荷親憐方闕簡諒幸邁踐長之慶願增有  
永之年

賀皇太妃牋

伏以荔出芸生兆新元之化育日中表正迎愛景之舒長國有盛儀時為令節中  
賀恭惟皇太妃宮闈躬循圖史德茂芝蘭位號愈尊居念滿盈之戒綺紈弗御志  
有節儉之風方物產之華明宜福基之隆厚某幸聯子育託愛親慈敢因稱慶之  
辰更祝維新之祉

禮儀公之集 卷四十一  
四  
祁國公冬節賀哲宗皇帝表

伏以堯庭觀象南面視昴星之中漢歷建正太初當甲子之朔一元肇始四海蒙  
休中賀恭惟皇帝陛下清明在躬中正履位進德修業志常念於及時誠意正心  
化以推於治國彝倫攸敘萬壽無疆臣庶慶本支叨榮爵土願言遐福等岡陵山  
阜之崇竊聽膚歌贊元首股肱之喜

賀太皇太后表

伏以天運日南周謹占氛之備君人道長漢隆賀至之儀聲教所同邇遐無外中  
賀恭惟太皇太后陛下誠明盡性睿智有臨淵嘿九重坐格無為之化梯航萬國  
咸歸至治之朝陰陽調和天地輔相臣叨居親息獲侍慈闈撞黃鍾之宮莫遠八  
能之士獻瑤池之醴願延萬壽之期

賀皇太后表

伏以緹室飛灰驗元陽之應律觀臺書物占黃稷之為祥海寓均和宮闈同慶中  
賀恭惟皇太后殿下徽柔迪德恭順存誠形閭內之教風躬先節儉享天下之至  
養居極尊崇元和肇新戩穀是荷臣承華帝系託質皇幃願乘來復之亨益介無  
疆之祉

賀皇太妃牋

伏以日昃極南辨五雲之瑞應斗繩維北兆萬物之豐盈降福孔多由中及外中  
賀恭惟皇太妃宮闈處躬淑慎履德柔謙慈孝兩全母道隆於萬衆寵榮兼至婦  
儀著於兩宮肇履陽元茂膺祉福某質惟蒙推躬託愛憐敢傾善祝之誠願介延  
洪之祚

大甯郡王年節賀哲宗皇帝表

伏以春朝上日青歲首時法駕臨朝受四海之圖籍大庭肆會設九賓之勺臚中  
賀伏惟皇帝陛下受命昊穹儲神昭曠為政以德體宸極之居中守位曰仁順陽  
和之布令斂時純嘏允集清躬臣越在穉齡叨塵名數三階有籍莫陪駕鷲之行  
萬壽無疆敢效岡陵之祝

賀太皇太后表

伏以行夏之時斗漸建寅之位立春之日帝臨乘震之司若聖御天以人為統中  
賀伏惟太皇太后陛下至仁溥博厚德直方獨觀萬化之原體乾之行健廣開眾  
正之路協泰之業征肇履三陽丕膺萬壽臣越繇童孺寵拜官封方元朔之受朝  
阻陪上列望宸闈而獻祝但罄精衷

魚委之文集 卷四十一  
賀皇太后表

伏以律中太簇授時允協於人正歲在敦牂居位適符於炎德慶叢元朔禮備宸庭中賀伏惟皇太后殿下坤德靜專母儀慈愛自家刑國廣治世之教風求賢審官佐東朝之德化春陽納社邦祚延休臣年始佩觿榮叨昨土望九儀之列未遂所趨奉萬年之觴徒傾善頌

賀皇太妃牋

伏以履端舉正頒歷象以授人開歲發春布陽和之育物禮標上日朝舉多儀中賀伏惟皇太妃宮闈柔順積中仁恩逮下奉兩宮之佐餽克謹婦儀膺萬乘之承顏益隆母道壽祺肇啟天胙丕延某稚齒無知宸居託愛早受封於茅土尚阻朝趨將獻壽於椒花徒深懇至

咸甯郡王年節賀哲宗皇帝表

伏以履端於始肇開獻歲之祥維春之祺增茂自天之貺紀為令節式舉多儀中賀恭惟皇帝陛下邁駿有聲孝思維則對時育物動植咸遂於生成體仁長人遐邇實均於富庶順承毅日翕受叢禧臣力僅勝衣心勤獻祝慶從日益朔復朔以無窮德與時升新又新而彌著

賀太皇太后表

伏以大鈞播物幹一氣以會於元治歷明時繫萬事而正其始新陽溥洽介福維多中賀恭惟太皇太后陛下其仁如天以儉率下廣鴻休於堯緒數法惟時佑駿德於湯孫世年深永肇履三微之始布宣四氣之和臣屬忝宗親齒猶穉弱賜稱廣殿阻陪臚句之儀壽祝南山更續岡陵之福

賀皇太后表

伏以椒花獻頌前占繁行之祥柏葉稱觴共祝延長之慶歡心交集協氣時乘中賀恭惟皇太后殿下翼翼贊商超任邈妙恩由義制戚里無過盛之權孝與時兼帝躬歸保佑之德春陽茲始天祉惟新臣藐在幼齡仰依鴻訓內竊逢辰之幸敢傾獻壽之誠

賀皇太妃牋

伏以玩占於易爻當乾卦之九三推歷於書氣應林鍾之益一福祥所介禁掖攸先中賀恭惟皇太妃宮闈德協靜專心循恭儉宮庭風偃化蓋自於躬行帝德日躋功實均於母愛履端茲始戡穀是膺某方在穉齡早依慈蔭仰祝絲長之慶冀酬覆育之恩



普甯郡王年節賀哲宗皇帝表

伏以計羣吏之功能若稽於戴禮受四海之圖籍嗣講於漢儀神人協和福祚曼衍中賀恭惟皇帝陛下智勇天錫輝光日新誠致中和民洽好生之德道先敦朴世陶遷善之風品物同榮慶釐並集臣忝聯棟萼託庇宗藩敢殫傾日之誠仰祝後天之算

賀太皇太后表

伏以春秋謹始之義正次於王大易生物之原帝出乎震三陽交泰萬壽攸同中賀恭惟太皇太后陛下稟濬哲之姿躬儉慈之寶擁佑元聖馴致太平之功奄宅多方已臻富庶之教對時元吉納祉無疆臣襲慶宗支叨榮屏翰荷皇慈之鞠育祈天祚之延洪

賀皇太后表

伏以呂令布和逮兆民而施惠漢宮講禮來萬國之貢珍允屬熙辰翕臻純嘏中賀恭惟皇太后殿下道光聖治性迪溫恭儼然象服之儀禮繇德稱訓彼女圖之事功以時修順履端元茂迎釐祚臣生蒙愛育幼被寵榮願傾葵藿之心冀續岡陵之壽

賀皇太妃牋

伏以獻椒花之頌式重於三正陳白獸之樽方成於九醞著為令序允格遐休中  
賀恭惟皇太妃宮闈履德徽柔秉心淑慎躬先九御倡陰教以踐修上應四星煥  
紫垣之明潤履新之慶介祉維繁某年在樞蒙恩承鞠育仰祝綿長之算倍傾懇  
至之誠

祁國公年節賀哲宗皇帝表

伏以奉元養物肇更正歲之端執規司春首運東神之化對時欽若介福紛然中  
賀恭惟皇帝陛下承丕顯之謨受穆清之命道格於上下率華裔以同風功軼於  
古今與皇王而共貫順履三陽之始茂迎六氣之和臣識昧知方心勤祝聖輝光  
其德與歲律以俱新億萬斯年配乾行而彌久

賀太皇太后表

伏以帝乘震位開春序之先朝斗建寅初首人正之朔旦歡盈朝野慶集宸闈中  
賀恭惟太皇太后陛下躬淑聖之資宅休明之運體乾坤而御世四海來同建氣  
物以乘時五躔咸備坐視璿璣之運順迎玉燭之和臣預列宗支方居童穉式歌  
且舞願傾祝聖之心俾壽而臧永對自天之貺

賀皇太后表

伏以天時潛運日當一氣之元人統更新禮重四時之首順承令序交舉歡儀中  
賀恭惟皇太后殿下德盛視天功深應地闕睢化下增隆周道之光長樂居尊崇  
備漢儀之奉維時初吉受祉滋多臣日侍寢門親承聖訓茂對三微之始仰祈萬  
壽之延

賀皇太妃牋

伏以人統得四時之正歷建夏家春朝受萬國之珍禮崇漢世迭稽舊典備著慶  
儀中賀恭惟皇太妃宮闈德耀中洲功光彤管儀刑自內居帝譽四妃之尊均壹  
為心得文王十子之慶荷天之寵受祉爰多某榮預宗藩日親宮闈祝春祺而參  
會與天序以俱新

蘇魏公文集卷四十八

宋太子太保右僕射同中書門下平章事司空魏國公蘇頌撰

逢年

高孫萬靈重拜

啟

耀庭

謝館閣校勘

右某蒙恩充前件職者覆實胡門之禁觀藝非長寘名渠閣之聯饗榮為甚異恩所被內省奚堪竊惟在昔承平之隆崇右儒雅之選並建冊府內儲秘文時登翹又之流以分繡於類例又擇該通之士以刊正於舛誤至於讎對之員漸開增置之目取人之路其任攸均逮祥符好文廣鴻都之書副跡開元故事有麗正之官名中經既充列職隨眾雖弗為通籍之貴方雜處寫官之間然而啟發篇章竄定朱墨並資殫洽之蘊是正文字之殊如匪值能誰云稱選伏念某才性弗敏識致本迂逢辰亨嘉就士聞燕初聞家訓戒餘力以學文寢誦師言務及時而進德旅從鄉賦僅策詞科得調三銓從事四府卒因累日之課稍進列卿之丞刀筆為勞久奔馳於外吏縑緡所志益愧負於初心希光英俊之游何堪榮進之望嚮者禁

林為之列牘朝廷恤於孤臣料從隨牒之卑收預試言之召愈慙陋學入賦嚴闈  
羣公尚蓋其蕪詞假之優署上宰不遺於介善賜以甄成冒詔綍之平除預書筵  
之濫綴摩研編削頓離簿領之煩躡纓整襟日接闈臺之彥省循其幸遭會有由  
此蓋伏遇某官協贊邦猶主平時論樂丞髦於皇家思致治於賁文人挾寸長靡  
聞於棄用士名一藝咸見於獎收是令眇微亦玷掄東眷所蒙之已厚期欲報以  
難輕固當負表宿官潛精志業考會字書之誤參訂於前篇詳求畧錄之餘更資  
於新簿冀成鉛槧之効弗累權衡之私

潁州到任謝二府

右某奉勅差知潁州軍州事已於今日赴上訖者久玷書林驟紆州組去閒就  
劇既懼且慙伏念某性本顛侗學無師法常持是古之論未免詆譏進乏適時之  
才自甘散滯荷承平之樂育獲儒館以優容宥歷歲躋亦更事局間輒謀於私便  
因請補於外官校中五經之書僅成編目假二千石之守俄被選俞自國而南潁  
為善郡長人之寄時號優恩昔之偃息以作藩莫匪朝廷之舊望豈伊孤進遂此  
一麾斯蓋伏遇某官至誠與賢平施稱物贊化鈞之獨運甄人品之眾流特矜羈  
拙之蹤見處便安之地誠為厚幸庸詎勝言方今民力尚艱邦刑未措屢煩溫詔

慎擇守臣自審庸愚方蒙任使敢不度時所急思職當行察編齊疾苦之源副君相憂勞之意少收課最上報生成

謝知府密學

右某近者得補汝陰待期江介望封圻而弗遠趨賓闈以無由矧素荷於知憐但傾懷於夙晤音騰闕禮簡曠成愆恭承肇屆春陽鎮綏民俗舍棠無訟考履多祥惟晉橐之巨賢本股肱之同體公權台輔之望眾議翕然弱翁治理之聲上知久矣諒俞音之匪晚佇歸節之傳趨某幸以世契之隆姑託陶成之賜騰裝有日去德采賒願勤遵養之方下副夙宵之禱

謝運使學士

右某去歲使旆過都嘗投謁贅遠歸去國輕遠恩門每懷獎與之私茲劇系馳之素此者叨從郡補獲隸使封揆材質之非才加吏文之弗狃惟民師帥之任懼無以稱於選掄賴部刺史之賢固足以振其愚短竊茲循省良用欣榮伏以某官性與道俱才為世出異學臻於聖域高談博於朝端步武中台久躋清要之地案條近甸暫依詳明之才朝廷方佇於謀謨朝夕即登於要近發乎經濟之運惠彼蒼黔之民時乃舊游永依大庇屬方莅事尚阻承顏願良食以自珍副遙心之所祝

謝運使郎中

右某昨被朝俞叨從郡補屬布條之云始思裁牘之未違不圖信介之來俄拜篋封之辱味言滋溢懷愧則深緬承副計之闕茂擁善祥之助恭以某官敏才經務冲識鄰幾聲震仕途華登郎選早膺朝委已樹政於制藩俄東上心從贊謀於澤節坐參調變行集富饒併疇膚使之勞入被近班之寵屬拘官守畏阻風期惟倍保於清襟冀遠符於瞻系

謝集賢相公

右某伏念郡組遐縈久隔門庭之侍台躔委照忽紆簡牘之頒仰荷眷憐居深感畏恭承保綏吉履增集天倪伏以某官鼎棟元臣著龜舊德儀泰階於三象歌巖石於四方筌宰同寅已載股肱之詠乾坤交泰坐凝社稷之功方屬夏歆未遑謁費伏望上副毗倚精調寢興

回謝集賢相公

右某伏念仰受煌之座每切於依投拜設密之函曲承於眷記恭審調燮元化寶練生經神相是膺天和並集伏以某官道符典則行者儀型明識以通古今重德以鎮風俗登翼維新之政弼成可久之規四海之瞻久蒙於利澤百年之化方見

於治平候屬商秋地遠賓閣伏惟上為宗社精調寢興

賀叅政侍郎

右某伏審某官即拜言綸叅持政柄被恩惟舊聞命胥權伏以某官鍾粹太和膺期盛旦奮材猷而入用契荃宰以相求立朝盡諒直之誠賦政有將明之効繁機密命昔叅賴於贊襄冢宰近司今薦移於寵任已積彌綸之效允諧中外之心佇進上階永毗至治某素慙惰學最荷深知推轂使前顧重恩之未答守符於外修慶謁以無由

賀樞密諫議

右某伏審某官寵膺制綽進貳天樞凡被眷私舉同拚躍伏以某官五辰鍾秀九德兼謨由大對而結主知虛旬歲而更器任常楊掌誥為一代之詞宗趙張撥煩居三輔之治最入陪帷幄叅據廟堂誕揚經世之才佇正秉均之拜某荷知惟舊聞命胥權限州組之方拘企賓階之莫及仰依陶冶徒結系馳

賀判府太尉相公

右某伏審某官拜恩典冊加數節旄坐移上相之庭就委三城之鎮翰垣增重寰甸均休伏以某官道德元龜朝廷隆棟入則順事於百揆出則宣力於四方勳業



冠時忠規簡上向自宰樞之均逸暫從輔屏以觀風謝有善君固周邦之相慶虞  
咨州牧將柔遠以任能繼煩同德之賢久殿折衝之地藩軍成績已遂請於魚符  
當展待賢佇再調於鵠鼎某早游翹館久去恩門欣聆前轟之還尚數行郵之遠  
限拘州印阻訪賓阒

回提刑度支

右某叨隸使封阻親燕晤敢謂謙光之眷特貽函教之儀銜賜彌深增慙殆甚竊  
審詳廉之暇益全頤養之方伏惟某官國棟宏姿寶珩粹稟負首公之大節宣應  
務之劇才曾猷刑章允副寬平之望已聞召旨佇陞要近之聯隆暑向繁高閔尚  
邇冀精葆衛下慰頌馳

賀安撫侍讀侍郎

右某伏蒙某官光膺中詔出鎮巨藩凡在提封舉深慶抃恭以某官徽符稟秀寶  
緯生才文窮述作之原識周治亂之體奮揚世美顯服禁塗授將鉞以臨邊繼收  
豐績侍殿惟而摘白屢告嘉謨懇辭京劇之煩請殿封圻之近懇旌伊始坐閭攸  
安矧望在於廟堂豈久留於方面佇聆召入副疇咨某被顧有年邈風尤切幸  
隸名於使管阻執贊於賓闕心所嚮翹言非殫究

回知府觀察

右某伏念嚮預朝趨每瞻顏表洎承郡補益遠門隅寔劇遡風之誠罕通執訊之問敢云貴要顧此冗閑紆翰勒以為儀篤情文而示好言因喜溢固多虛獎之談志以方回乃盡勞謙之意祇循惠好豈廢中藏伏以某官生質粹淳才資敏給席公侯之餘慶簡睿聖之深知譽洽士倫恩隆戚里廉車命秩誠德位之相先使竹臨民矧政刑之允濟已從詳試即佇褒遷限封壤之正遙接燕言而未遂願順生經之固少符善祝之勤系慕所深究宣匪逮

賀知府龍圖

右某伏審光膺朝檢出布藩條凡荷眷知舉深抃躍恭惟某官學窮精祲德富誠明繇邇聞之敷經踐禁塗之持橐歷更典領益著謀猷間得請於黼帷遂均休於符守初聆頓節已傳來暮之謠矧在鄰疆竊幸餘輝之庇方修贊禮遽損占書載循喜溢之言第劇欽銜之素封郵雖適音旨坐遙佇聞召節之頒前慶近樞之拜炎威如熾鈴閣方休冀眠食以自將副夙宵之所禱

回祥符知縣郎中

右某伏念符守拘縻標顏阻邀徒切遡風之想寔稽染翰之儀遠既華函曲敦重

禮眷此晚生之無似奚堪舊德之相先銜愧自中刻銘罔替伏惟某官士林孤秀朝路通才試政事以其詳藹聲猷而彌遠即省時之清望久爾踐揚亦縣國之要官重茲委用已著循良之效行膺顯近之資姑冀護調少副勤企

回同年著作

右某伏審同年著作被諸府之薦能副三銓之覆寔拜恩槐陞進秩蘭台素推應務之才茲實漸磐之始夙叨朋好竊扞榮陞官次坐縻展慶儀而未逮謙撝遠駕紆華幅以為先展味懿辭欽承重禮但感銜而未足遂藏棄以無忘時方用才日遲登俊永言傾嚮匪假周談

賀留守相公辭太原再領西京

右某伏審某官光被贊書進崇命數推至誠而確讓止褒冊之既行特帖後恩即移舊府義激周行之次歡騰近甸之間伏以某官異學際天元功冠世熙帝之載則書敘九德之歌知幾其神則易稱萬夫之望自兩登於魁柄皆弗處於盛名委政廟堂出藩畿甸邦國若否昔賴山甫之將明輔助重輕今繫晉公之出入昨以虞州咨牧漢冊圖勳坐移丞相之庭往殿太原之壤端揆崇秩所以尊師長之賢尹正重名所以增方鎮之體矧粉榆之故里佇莛蠹之來歸而相公內樂安閑弗

榮寵利亟露章而懇敘務辭爵以彌堅宸扆為之動懷朝制因而收汗止拜常山之節還臨洛宅之都俞命傳聞羣倫懍歎竊謂荃宰相契上方有舊人共政之求寓跡具瞻下益思大鈞播物之惠雖暫諧於沖志諒即被于疇咨三冠鼎槐抑有本朝之故事再開鑪冶將副率土之傾心某早荷甄收方塵郡寄側聽保釐之始欣依臨照之餘恪守印符莫獲收於慶謁傾馳懇素姑永托於生成

賀知府龍圖諫議

右某伏審茂膺恩渥易守藩宣伏惟慶慰恭以某官清德藹躬懿文邁古逢會光華之旦回翔清切之塗輟內閣之論思均侷人之委寄政成惠洽民詠朝咨再勞撫俗之仁來綏近甸佇對馳軺之名亟進通班繼聖世之令猷畢宗工之能事某忝分州節仰託使封恭聆坐閣之初未遂趨隅之謁傾依盛德曷諭丹誠

謝二府

右某嚮以忝恩為郡使日布條循公式以騰書遡台庭而露懇地有常尊之隔禮無宜答之文豈謂某官牧德至虛降心小物乘政司之多暇紆記室之報章眷舊甚勤特屈廟堂之範披文未既頓生州郡之輝惠賜不訾感銘無盡恭審內贊邦家之務助宣天地之和六氣茂康百祥叢集斯文未墜天方降任於哲人至治在

辰上且仰成於良輔敢冀勉遵時令順護生經益副萬樞之毗更增九鼎之固某  
限拘使竹坐隔翹材竊深豫附之情永賴陶成之賜

轉官謝二府

右某比者伏蒙制恩特授前官者攸司上課成命下頒進位甚優省躬斯愧伏念  
某小才曲藝孤進晚生敘歷朝闈浸塵儒館懷鉛雖久書未畢於汗青請郡既行  
詔遂分於半竹凡更內外頗涉成年屬大比之甫期乏寸勞之報最公朝平施著  
令應遷擢聯三署之行仍躡左曹之要異恩所被非服是慙此蓋伏遇某官陶冶  
百工權衡眾職使士大夫各稱其任無賢不肖皆用其長心推至公道弗異遠眷  
是顯愚之質薦蒙樂育之私增秩留州荷深仁而已至悉心為政惟來效之是圖  
將論報於生成敢憚勞於夙夜

轉官謝監司

右某比者叨膺制綍敘進郎曹寵渥所加庸虛靡稱伏念某天資弗厚學術固疎  
仕歷朝闈職塵儒館內掌故事於時無益於毫分出領近麾臨政未聞於善最屬  
攸司之大比緣滿歲以應遷增秩甚優冒恩為愧此蓋伏遇某官澄清使部振肅  
治綱羣吏臧否賴案廉而悉上公朝黜陟俟贊啟而後行非才所蒙其故繇此但

益勤於吏職期不累於已知

提刑轉運先狀

右某伏審某官差日登車便時行郡冒瘴塗而匪易擁茂福以無虧露檄諸城已稟行臺之範屬難近次佇修列郡之儀瞻望風徽竊深悚抃

賀運使度支

右某伏審某官內膺制綽出領使權伏惟慶慰恭以某官文懿學純德方氣直夙擅儒林之譽早登郎署之榮司會佐籌朝用富彊之畫近畿案節上洛良直之謨行觀風績之騰聞入副宸庭之顯用某適叨守郡獲事提封第傾賀履之誠尚阻承顏之願其於欣激曷諭端倪

賀知府侍郎

右某伏審光膺中詔榮鎮巨藩伏惟慶慰恭以某官秀稟天元識探道奧早躋榮於顯路自結知於上衷屢分圭竹之咨薦著循良之效撫綏方面坐期風教之凝進拜樞衡式副巖瞻之詠春陽伊始使傳方勤願益保於生經庶遠符於私禱

賀淮南運使

右某伏審顯膺詔檢榮總使權伏惟慶慰恭以某官秀稟天元識探道奧自結宸

疏之眷爰陞即署之華日著聲光屢歷藩宣之委朝資經度總司兵食之饒利毫  
坐析於江淮風節聳驚於郡邑疇迎褒召別踐顯嚴豈惟協輿議之歸故可展大  
賢之效某比拘班教尚阻承顏冀順保於生經庶益符於私禱

回侍讀

右某言念奔馳吏職隔濶俊游嚮義雖深親賢未遂豈云明哲之見顧既以緘書  
而示情德盛禮恭有勞謙終吉之美道同志合推相下不厭之心自惟薄才徒服  
高誼恭承綉次於儀典方勤啟發於篇章累朝所行一旦大備自非精思之敏曷  
究淵源之來勉冀護調將副咨用區區所禱喋喋靡宣

回壽州知府到任

右某伏審某官出持使節已署郡條頒仁政以便民聽風謠之載道矧素推於才  
譽已詳試於良能諒非瓜戍之期即被璽書之寵別躋顯用乃協輿言某叨假使  
麾幸依鄰壤方竊潤河之脰遽承占牘之貽欽佩多儀但深於刻著面懷懿範深  
切於系馳姑願珍調少副勤祝

回知府內翰

右某伏以天府浩煩之地任峻時權複門演潤之司職崇內者側聽恩俞之始寔

增扑蹈之誠恭惟知府內翰與學輔時懿文華國魁甲多士羽儀盛朝暢風教於  
近藩備諮詢於法從龍荒結好生原隲之光輝懿禁代言增訓辭之深厚暫勞治  
劇即慶登庸敢意眷慈特貽手問荷謙為之有素激悚抃以逾深願勤道養之方  
少副傾祈之素

回伴讀郎中

右某伏審趨召節之嚴已修陞見視宸闈之學爰蒞官儀裁慶問以未遑沫勞絨  
之猥及載惟謙厚增切悚銘恭以某官直道被躬純誠許國謹信自任祕温樹而  
不言清廉所高潛即曹而為樂國藩初進聖慮攸先式願老成之風首膺進讀之  
任春陽在候燕晤未涯倍冀珍頤用符誠禱

回廬州知府郎中

右某近者使臆過郡獲修贄見之儀征旆首塗旋愴風期之遠辱華牋之猥及荷  
厚意之彌深竊承涓日惟良布條伊始幸接瓜鄰之末實依河潤之餘恭惟某官  
植操端方懷誠蹇諤出被藩朝之委入分財計之司聿眷耆明均休近輔矧淮淝  
之奧壤控南北之通達英節之臨實均於方任甘棠之愛佇見於詠歌春律載陽  
晤言正阻倍祈保衛式副企瞻



回鈐轄

右某嚮叨共事幸親談燕之娛俄屬改轅遽悵聲容之別方深企德猥辱占書竊承衝涉之勞無爽和倪之妙恭以某官清規格物淑聞藹時早緣睿眷之隆薦領兵防之寄謀惟可倚講練尤精諒匪俟於終更即別膺於峻召披風正遠珍食是祈欽祝之誠旦夕以冀

回郢州知府學士

右某嚮者某官輟蓬山之直紆富水之章聆涓便辰即署新政頌春庶俗已騰愷悌之謠講好他邦遽逮緘書之禮自惟亡狀素辱與游相望隔於封疆馳神劇於歲月恭承惠好增激感悰竊以某官修性淳明執道深固學術足以表於士類政事足以達於民宜入觀石室之書已大正於訛失出假竹符之守蓋暫試於才猷異時從橐之求當首追鋒之召朋從之分公存實勤惟善御於冲和副祝祈於旦暮

上交代職方

右某伏審光膺綸檢就領州章伏惟慶慰恭以某官識量淵淳風猷沈正屢更事任益著聲光薦仰副於朝咨來暫分於州寄自慙前軫得忝交符佇臨滿戍之期並敘與游之舊初爰在候珍食是祈行趨召節之嚴別踐顯塗之峻

二府賀冬

右某伏以日御迎長斗繩維北地雷行畫慶叢陽復之亨鐘鼓布庭儀盛歲元之亞恭惟某官道躋民極德配黃鐘宣曜三塔之符參和六典之職信功順事有若虞之臯夔應變守文則為我之姚宋適履嘉辰之會方毗至治之期益介壽祺永扶運祚某限持州節阻奉慶觴係翹館以馳誠託書筠而寡喻

外任兩省賀冬

右某伏以室琯升陽臺雲紀瑞輯朝圭而展慶獻紋履以迎長伏惟某官性蘊端方德猷純茂已試大儒之效自結明主之知蕃宣屏翰之勞四方稱誦輔弼疑丞之任匪日登洛乘吉旦之嘉亨擁祥經而脫厚某限縈州組坐隔賓軒祝望瞻依倍百常等

鄰郡賀冬

伏以天正開統日晷迎長挺柔荔以應時候飛葭而布琯伏惟某官躬富才美治稱良循方開吉祿之榮益嚮純禧之茂冬曆官次阻敘慶儀但勤致祝之誠莫究傾思之意其於祝嚮曷既聲言

二府賀正

蘇魏公文集卷四十八  
右某伏以七始推元三正建朔布典常於王闕會朝貢於春庭穀旦惟新近司叢  
社恭以某官天鍾全德體踰大方協期運之休明應塔符之炳耀內總三事朝廷  
以之尊榮外撫四夷方隅以之底定適屬履端之始允膺昇壽之祥永輔熙平式  
光才美某守符於外贊謁無階瞻望門墻但馳誠素

外任兩省賀正

右某伏以履端於始史氏所以正三朝以正次王春秋所以尊五始矧會得天之  
數見臨交泰之期恭惟某官直道體和嘉猷濟眾緣飾真儒之事布宣明正之恩  
近甸列藩被仁風之浹洽元正上日開繁履以駢繁乘此春祺行歸禁路某拘官  
有守敘慶無階禱嚮瞻依實倍彝等

蘇魏公文集卷四十九

宋太子太保右僕射同中書門下平章事司空魏國公蘇頌撰

逢年

高孫萬靈重拜

啟

耀庭

謝知制誥

右臣蒙恩授前件職者驟屢清禁仰服華褒才不副時愧無容處伏以王者審乎  
出令莫重訓辭儒臣職於代言是為華選自百篇之義缺洎七制之主興代有裁  
成之文形於播告之指述辭意則貴乎深厚而爾雅語詔冊則欲其昭毅而和莊  
象夫揚庭言之文者行之遠演絲成綉體之大者述之難必資起草之工以贊發  
中之命右文在旦多士盈朝除書德音如常揚者時不之言語侍從比朔臯者未  
足多光輝眷橐之聯增俊陸康之等繼登茲選未易其人如某者才非有以絕羣  
學不足以適道屬少孤之多難常苦節以自持不辭小官蓋竊遠親之祿入望大  
利固無經國之謀幸當路之為言預複門之試可進登書府涉歷歲華職有屢遷  
效無薄最間奉召趨之一節入塵記史之二星載筆赤墀已玷從官之末著篇

黃閣遽膺寵典之優陞置掖垣典司渙令矧右曹之清秩實先子之嘗僚深愧輒生復仍故職坐卧敢當於舊位翼成懼棄於後基世掌絲綸徒竊古人之美習知臺閣設先寒士之求此蓋伏遇某官協贊聖辰主平公論士無愚哲咸歸品目之明言有吁俞素啟上聰之聽是令疎外辱在甄成敢不刻志始終匪躬朝夕奉遵職禁道無替於守官圖報思心不忘於知己

亳州到任謝二府

右某蒙恩差知前件州已到任上訖者隨官責薄敢辭遠守之勞易地恩優再竊近藩之寄適由使道遂此布條叨幸居多悖惶曷已伏念某挺至愚之稟無通用之才頃冒憲章上孤樂育一麾出守已荷曲成之私六輔陪京遽膺內徙之寵虔命始臨於位表銜恩豈在於他門此蓋伏蒙某官推致大中之原輔成至治之極振滯淹以廣賢路靡有遐遺棄疵音以盡人材俾其自效良慙懵昧復被甄收猥從僻陋之邦寔獲便安之地奉循詔令當官彌念於匪躬追省愆尤戮力尚期於晚節

亳州到任謝兩省

右某近膺朝命易守輔藩方具蒞事之初屬嬰多故惟是奏書之緩深愧非儀姑勤企德之誠猶惕負恩之誚伏念某早由孤宦誤擢近班不識稽違坐鑄西省之

籍至仁測隱出假東陽之麾郡壤雖遙土風甚嫩頒條暇日但思追省於愆尤去國踰年不幸重罹於憂患旅懷多感榮仕寔忘豈圖易地之優獲在陪京之列非惟出於遠僻且復便於私營此蓋某官以直方之道致君以忠恕之心格物外收棄置使有漸階自慙疢首之餘未副稱揚之惠寬其罪咎既蒙觀過之知勤於吏資敢乞當官之效心之蘄嚮言豈勝陳

賀昭文僕射相公

右某啟伏審某官筆述聖經書聞宸辰言綸誕告秩增左相之崇台鉉兼華地進東臺之長式彰儒効永化人文恭以某官生德自天潛心於古立言垂教若稽姬孔之猷熙載奮庸無媿臯夔之業閎學者之師詩欲聖人之指明間奉淵謨講詳典籍之奧獨推卓見發明義理之歸甫終汗簡之功盡革頡門之陋微言之緒復續於當今大道之行可期於茲世宜服罷嘉之渥進居師長之尊多士是依萬邦攸慶某拘嬰符鑰阻拜門藩涵泳塵編常患迷塗而擿埴參評舊學將期發覆以開明竊抃之誠喻言曷見

回交代資政侍郎

右某啟伏承某官請麾便郡移節近圻尚稽緣鵠之謀再遂左魚之適顧惟鄙陋

夙忝從游慙無告政之能將幸承顏之便雖嘗奏記已愧後時豈圖公輔之尊曲  
徇平懷之體遠紆教尺過有謙撓兩紙八行固親疎而有意一日三復姑臧去以  
為榮伏况丹宸虛懷明庭佇告豈止平生之交義久俟彈冠諒惟遐邇之人心咸  
思躍冶郊迎有日忻抃尤深更祈良薄之餘益厚將綏之祉乃清企嚮臨紙奚言

回知府經畧密學

右某啟伏審顯膺宸詔進直內樞勲望益高輿情胥慰某官器能宏博智畧淵通  
早推望族之華復擅文場之秀踐揚中外歷試劇煩制閩西陲進拓金湯之固斥  
疆遐服盡收冠帶之民躡躡禁密之聯益示疇咨之漸方欣異數遽枉華緘祇認  
眷私銘藏悃素

回知府內翰

右某伏念邊遠門序第傾企向之懷恪守郡條時闕興居之問敢期隆顧遠辱貽  
書銜眷良深增慙固甚竊惟剝劇之裕無爽頤生之和伏以某官時棟上材聖門  
高第文章國之經緯德業民之表儀自奮躍於天衢遂簡知於黼座雍容禁複潤  
飾王猷不離侍從之聯總治浩穰之地名威已振儒效益彰諒匪俟於累朝定進  
陞於四輔暑躔加畏賓館尚賒伏冀精調庸副虔禱

回知府內翰

右某伏審某官寵膺朝制正尹都畿以文章侍從之才治眾大劇煩之地未勞餘力以副具瞻伏惟某官賢業絕人忠言許國入當三冊之問遂冠四方之憂黼座虛懷待以公卿之器金坡進直演成謨訓之辭上方以吏事而任三公時皆由選表而登二府今煩俊哲而為治實賴威名而鎮時諒匪累朝遂登大任某久游材館方假州符阻贊謁於賓閣但馳誠於天邑

回南京權府運使中允

右某此者叨膺制命獲守留京自省庸虛有慙寄任竊念某所憑不厚自視無奇徒用簡編之資漸昏台閣之選未蠲謫籍復敘郊禧閱麗正之圖書再塵儒職委離宮之管鑰繼荷恩章矧近府之會衝豈非材之宜據顧惟多幸得在隄封奉行新書敢不悉心於庶務振舉大要方將稟誨於外臺豈謂某官屈使範之威眷明譬之舊日圻千里俯勞臨蒞之煩手札八行先枉勤渠之問披尋辭意銘篆膺心佇趣辦嚴之期即修謁贊之禮自餘悃款靡俟究宣

回南京通判郎中

右某言念折符南服再越於歲期易地近疆薦叨於恩制適從便道遽此頒條企



望藩封竊喜仁鄰之援拘榮官守無階晤語之期豈謂某官眷舊情深為謙志篤特遣行人之使首貽累幅之書發以榮辭茲見相先之範藏之私褚彌敦永好之隆坐阻風徽難宣感悃

### 回防禦太傅

右某啟伏審胡門覆實文躋科等之優英節超恩秩峻州防之寄宗藩擢秀士論推高竊以國家系本仙源慶流屬籍九族以睦廣帝堯文思之勳半楚而封盛炎漢王公之制寵拜雖緣於世緒褒甄必校於藝能時有卓爾特立之才上副宸然首舉之選恭以某官性資明敏問學該通志外綺紈之華躬持韋布之行河間好古樂與諸儒而並遊更生屬辭遂偕羣雋而進拔俄給上方之札高中有司之程大對危言帝每篇而稱善通侯列爵位不次以加榮匪惟冠映於懿親固亦光輝於多士某欽聞時譽阻邁夙期官守攸拘展慶儀而莫逮親賢垂眷枉翰尺以先貽載觀揆操之華但切覲顏之愧無緣燕接益用銘銜

### 回河東都運諫議

右某啟伏審某官寵膺詔綍進擢諫坡仍留將漕之權且重撫封之寄素叨眷與竊忤鄙悰伏惟某官方正自持清通不澆早服教忠之訓久彰應務之才贊劇治

煩風力稔聞於臺閣頒條刺郡聲猷夙聞於朝廷惟唐晉之舊墟搃羌戎之衝地均輸所寄功最荐登坐收制勝之謀就拜履賢之典陟天子諍臣之列已峻近班繼大門先德之榮益為盛事感意謙光之重不遺棄置之餘首貺牋封過敦禮範荷明哲久要之契銘著不忘祝公台大用之期傾依有日乃誠虔企臨紙奚言

### 回瀛州安撫待制

右某啟伏審某官被發中之詔膺謀帥之權進班禁閣之游杖鉞瀛關之壤時登雋哲士有輝光伏惟某官以奧學清文羽儀台閣以英聲茂實簡在朝廷向自書林之校文出分漕輓之將命兩淮川陸之會肅抗風稜二史言動之司旂歸禁從方告猷於帝右復須使於朔陞引鍬運籌薦修農戰之備鑿門推轂遂有軍帥之求寵加荷橐之聯益重元戎之寄為光清世襲美德門緩帶寢兵已擅羊公之譽緇衣善職行歌鄭武之詩某早被眷知久違英晤自聽撫邊之拜久稽奏記之儀何大雅之謙撓不崇體貌傾並遊之冗外特貶絨書豈惟荷聲氣之所同抑亦增茂悅之深慶在於欣激難悉條陳

### 杭州到任謝二府

右某蒙恩差知前件州已到任上訖者全吳故社甯海雄藩異時禁近之巨公出

為屏藩何意斤疏之遠跡遂許長臨適茲賦政之初深愧冒恩之厚伏念某器非  
闕遠躬負愆尤絕覬榮塗止期祿食昨罷睢陽之筦入趨魏闕之朝典領圖書會  
與諸儒之眾武出入臺省得階適綴之班聯會江淮之薦飢煩宵旰之遐慮咨求  
良木偶擢匪才投命飲水敢自營於私使之官使道即宣布於上恩方事之叢以  
榮為懼此蓋某官道佐明主德施遠方眷東南隅之民尚艱粒食擇二千石之吏  
俾又海邦再省辱虛美堪責任敢不上體朝廷之意恪奉詔條拊循家戶之人使  
安田里庶幾免過仰副至公

回越州知府大資

右某啟比者叨分朝寄獲假州符惟東南之要衝當煤炭之為珍宜求宿望出布  
上恩顧茲蹇躓之餘素乏循良之譽誤膺咨牧來此長人受命飲水姑夙宵而增  
揚之官使道頒條詔以云初伏遇某官暫輟政機出臨藩閫封疆千里幸依鄰國  
之光坯冶一陶更貯化工之賜敢謂謙為之德特紆款密之書味藻思之彌高但  
銘丹臆望翹材之甚通阻侍清塵感嚮之誠敷陳無盡

回致政太傅侍中

右某伏念假使竹於一方跡歷江海望翹材於千里目斷雲霄居慙走俗之勞遂

闕問安之禮自惟簡忘宜取悔尤豈謂某官波量兼容台躔委照因燕居之多暇  
裁尺素以見貽兩紙八行親枉鍾毫之妙片言一字意踰魯筆之優兼聆高蹈之  
間固有多祥之集非徒感誦並用欣歡重念孱虛夙承獎拔離奇為器曲成特出  
於化工連蹇逾時棄置自甘於散地張舊恩之莫報嗟末路之攸拘慕赤松之遊  
無階企仰祝大椿之算但極傾馳

上西川知府端明侍御

右某伏念辱知素深去德滋久下邦假守顧簿領之攸攬上館馳誠通記函而殆  
闕緬維德履時擁天和伏以某官道繫斯文名重當世立朝則遠史之載直作鎮  
則方召之告猷西南一都已榮後拜之寵左右四輔佇繼緇衣之詩尚阻趨隅倍  
祈良食孤羈之迹陶冶是期

上大孝昭文相公

右某啟伏以某官以不時出之才內輔朝政以大丞相之重躬執親喪伏自倚廬  
西還灰籥屢變聖上惟同體之義夙夜注懷士民思造物之仁邇遐延首諒典冊  
之前降期壺冶之再開蓋故事本朝之當行況上公虛位而佇復將兩全於忠孝  
宜俯就於情文某二紀荷知八年受賜迹留書館張去德之踰時恩假州符盡提

衡之素惠限茲遙阻未獲瞻承中心欲陳萬一奚究

回登州知郡司封

右某啟向者某官奏南司之課膺中詔之褒進左曹於省聯領輿藩於海裔蓋切循良之選受咨端諒之能自承擁傳之去東居悵拊塵之坐隔懷鉛自窘未遑緘候之儀占牘不忘首辱惠存之問聆布條之伊始惟善俗之有方政務多間福基眾厚伏以某官與學敏識峻節孤風得古人之清通為來者之矩矱郡邑之政沛然謐於民言臺閣之模凜乎肅於朝著方倚直繩之用遽膺半竹之行昔者由御史而為省郎唐官謂之清望出諫官而補郡守漢臣由而自陳矧惟碩哲之模允協前良之美諒茲出守聊為外資詠中和之詩已宣於主澤還顧問之列行奉於帝俞榮據顯華之途參為孤拙之比適臨歇暑請遠清言願遵御於氣沖冀冥符於善禱乃情依鸞紙筆奚殫

回宿州知郡郎中

右某啟伏審某官出分使節已布郡條頒仁政以便民聽風謠之載道矧素推於才譽已詳試於良能諒非瓜戍之期即被璽書之寵別躋顯用乃協輿言某素偃聲猷幸依鄰壤方切餘輝之燭首蒙尺牘之貽仰報謙撝但深悚荷

賀樞密相公

右某伏審某官寵膺制冊入冠樞廷賢哲在朝中外交慶恭以某官謨資六德道贊九功二紀奮經綸之謨七年當鈞治之柄致君之慮達於天淵許國之成貫乎金石庶務由之清穆百度為之和平昔由陟此之宸始正居廬之禮三年之孝已著於儀刑羣辟之師再符於夢卜惟新大正原任舊人僉謂元老之尊特重本兵之地山甫文武之顯式副東求傳說鹽梅之和聿隆瞻望某拘縈使竹阻造賓扉仰明命之誕揚倍常倫而歡抃

回告諭太保

右某近者伏承某官出諭帝宸之旨循行侯服之遙惟是末封獲瞻茂範雖喜接辭之便且慙為禮之疎屬軒旆之不留恨風規之遽隔料惟登頓無爽粹和適茲疾置之來首辱華賤之況謙撓過厚感戢奚勝矧以聖政惟新遣使以安於列壤時才被選抗旌允副於上心就竣事以還朝已疇能而被寵清秋伊始闕館正遙冀眠食以自珍慰夙宵之所禱在於傾嚮靡迨周陳

知府祠部先狀

右某伏審某官榮分漢節出鎮淮藩驅大旆以戒行歷敵封而甫邁悠逢冒涉諒

無爽於履祥近境將迎佇恭投於典謁乃心所嚮須面殫陳

### 回觀察太尉

右某近審某官懇請州麾出觀藩政方布使時之治已騰來暮之謠朝倚值才士論歸美矧屬成賢之望累更中外之煩風績素隆柄任伊漸承偃藩之多暇傳占牘之斯來仍顧緘生均紆厚禮榮辭見假本由兵下之誠高誼所臨永訂要言之好在於感惕粹乃棕襟當寒律之正嚴諒神倪之益泰更勤輔養遲對寵嘉區區之心喋喋無喻

### 回省副

右某言念縈縻麾守隔閩門闕雖傾嚮誼之誠久闕馳郵之問敢期謙願遠墜牋封諦味情文交輸幅臆忻承副計之暇無虧養浩之方恭以某官道本直清志敦恬裕逢辰奮於才美載世踐於顯華使節觀風宣四方而著效計庭參畫通九府以收勳諒弗俟於累朝即列膺於大任爰暉已熾崇館方遙尚冀精調少副詹禱

### 上陵使相公

右某伏審某官暫違宮闕祇事寢園營萬世固安之撫慰兩宮哀慕之志恭惟已竣陵域歸止廟堂忘履跋之為勞固神明之薦祉伏以某官清甯間氣道德元龜

文武憲乎四方漢猷宣乎九德昨者先皇厭世嗣聖承祧綴衣在庭首當顧命之屬同執至會躬案因山之儀方大號之惟新賴庶綱之有紀熙帝之載邁虞書股肱之歌王功曰勳紀周人彝鼎之器永光鴻業允副具瞻

回太原經畧相公賀冬

右某啟伏以友飛氣應歷推天統之元剛長朋來易著乾陽之始伏惟某官任隆三事望重四朝輟端揆之彌綸布藩宣之條教簡簡降福慶已協於迎長巖巖具瞻民共歌於畫一敢期謙德遠貺華歲仰承眷與之私深積悚銘之素莫違面敘愈劇心搖

回賀冬

右某伏以珠躔起歷竹律生音斗指子以平時氣萌泉而任物恭以某官公忠挺操幹敏馳聲適逢會於亨辰將茂迎於蕃祉限拘麾守阻奉賓儀方結懷芝首蒙華問祇佩眷勤之意但深悚企之私